

هذا الكتاب هو أحد مطبوعات محمد حمدي

محمود تيمور يقدم باللغة العامية

مسرحية فكاهية من ثلاثة فصول

المخبأ رقم ١٣

جميع الحقوق

محفوظة للمؤلف



الطبعة الأولى

طبعة خاصة

المخبر القوي ١٣

كوميديّة من ثلاثة فصول

تأليف

الاستاذ محمود نيمور بك

عني بطبعها ونشرها

محمد حمري

محرر «الحوادث» الشهرية

مقدمة

بقلم الأستاذ محمد حمدي

هذا ثالث كتاب نصدرة لتيমور بك باللغة العامية ، والكتابان السابقان هما : « ثلاث مسرحيات من فصل واحد » و « عروس النيل » .

وأغلب الظن أننا سنوالى إصدار قصص باللغة العامية لتيمور بك ، ولغيره من القاصصين المصريين ، بعد أن نجحت التجربة ، نجاحاً باهراً . فقد أقبل القراء — في مصر — على مطالعة كتابينا السابقين حتى أوشكت النسخ المطبوعة منها أن تنفد ، وحتى أننا نفكر الآن في الاسراع باخراج طبعة ثانية منها .

وقد علقنا صحف عديدة على هذين الكتابين ، وكتب الفضال الدكتور أحمد زكي بك فصلاً مسهباً في مجلة « الثقافة » الغراء عن الكتاب الأول ، والمكرة التي روعيت في طبعه : فكرة استخدام اللغة العامية وكتابة الكلمات على أساس نطقها ، يخرج منه القارئ بأنه لا ضير على اللغة العربية من شيوع هذا

لضرب من الأدب باللغة العامية ، حيث أن حوار القصص لا يجري في واقع الحياة ، باللغة العربية ، وحيث أن تسجيله بهذه اللغة ، لا يضير العربية الفصحى في شيء ، لأن هناك نواحي أخرى عديدة تستخدم الفصحى في تدوينها .

والدكتور أحمد زكي بك من كتاب العربية الفصحى ومن ذوى الأناقة والتميز في الأسلوب ، وصدور هذا الحكم من أديب فاضل مثله ، له قيمته . ونحن نكتفي به في التدليل على صواب الرأي الذى ذهبنا إليه .

وهذا الكتاب الثالث الذى تقدمه للقراء ، هو مسرحية ضاحكة فى ثلاثة فصول ، شاءت عبقرية مؤلفها الأستاذ محمود شيمور بك أن يجري حواراتها كلها داخل مخبأ .

ومن منا الآن لا يعرف المخبيء ، ولا ينزل إلى المخبيء ، ولا تحدث له حوادث فى المخبيء ؟

لذلك نأمل أن يصادف الكتاب استحسان القراء ، وتقدير
الأدباء

الناشر

محمد صمدى

أشخاص الرواية

نبيل بك : فتي أرستقراطي ، يبلغ الأربعين .

شكيب بك : شاب من الطبقة الراقية ، خطيب محاسن هانم
محاسن هانم : خطيبة « شكيب بك » فتاة من الطبقة
الأرستقراطية المحافظة .

فهرهم الحسن : أستاذ مبادئ العلوم في المدارس الابتدائية
بالريف . من أنصار مذهب « دارون »
برجيت الناعم : شاب مهذار يعيش في الحياة وفق هواه

قسقورس : ماسح أحذية ، وضعيف النفس ، زرى الهيبة
الشيخ عجمية : رجل أبله أخرس

القولى : بائع الكعك

عفاف : فتاة من غوانى الملاهي

بسبوسة : امرأة عجوز من البلديات

ذهب أفندى : مراب :

البرهي أفندى : صحفي .

الفصل الاول

(يرفع الستار عن مخبأ أَرْضِي
أَوْشَكَ بِنَاؤُهُ أَنْ يَتِمَّ . المخبأ خال من
الناس . تسمع صفارات الانذار
بحدوث غارة جوية . يهبط الناس
إلى المخبأ . الوقت منتصف الليل .
نرى أولاً فوجاً صغيراً مؤلفاً من
نبيل بك وقشقوش وخلفهما ذهب
أَفَنْدِي)

غيبيل بك : حاجه تدانيء ... ياريتنى سافرت العزبه ...
ذهب أفندي : (لنفسه) غارات ... غارات ... شيء مالوش

آخر ... ته نيل أعمال وَوَافِ حَال (يلمح نيل بك) أهلاً
سعادة اليه ...

نيل بك : دهب أفندي ... الله ... إنت هنا ... ؟

(يتصالحان)

قشقوش : (لنفسه بعيداً عن نيل بك ودهب أفندي)
إيه الأيام اللي زى بعضها دى ... دا خراب جيبوب يا عالم ...
شילה يأم هاشم ... شילה ياسيد يابدوى يالى سرّك باتع !
دهب أفندي : (لنيل بك) يآري الفاره دى حاتطول
ولا إيه ؟

نيل بك : الفاره بتاعت امبارح فضلت ساعتين على داير
دئيمته !

دهب أفندي : لا يا ييه ، وانت السادى ... ساعتين وربع
بالمظبوط ... أضيّتهم فى المكتب أشتغل بلمضة زُرَاه ، يادوب
كنت بشوف طشاش ...

قشقوش : (وهو فى مكانه البعيد) ساعتين ولا أكثر ،
الأصد ربنا يفوت الوأت على خير ...

(تهبط محاسن وشكيب)

محاسن : حنكون هنا ف أمان ياشكيب ... ؟

شكيب : أ مال يا محاسن ، ماتخافيش أبدا ...

محاسن : والتي صحيح ... ؟

شكيب : دا الخبأ بالأسمنت المسلح ... ومعمول بالطريئة

اللى تخلصى الهوا والنور يخشوا فيه ..

محاسن : لكن ماما ... بابا ... يا ترى ياهل ترى ... !

شكيب : إحنا عرفناهم راحوا فين بعد ما خرجنا من

السينما ملهوجين ، ما حد عارف أخوك من ابوك ...

محاسن : مش أحسن اتنا نخرج ندور عليهم ؟

شكيب : وهو ديبان الخبأ اللي وائف على الباب يرضى ينفدنا

من عتبه دلوات ...

(يتبادلان الكلام بصوت غير مسموع ويتفقدان الخبأ)

قشقوش : (لنفسه) هو دا وأت الواحد يسأل فيه عن

سيدى أبوه والتي حارسها امه ؟ ... مش ييوس إيده وش

وضهر اللي حماه خبأ زى ده بالأسمنت المسلح ؟ حكمتك يارب

دهب أفندى : (لتبيل بك) حنتهى الغارة على خير إن شاء

الله ... يابن عليها كده بازن الله !

تبيل بك : برضه كده .. وعلى أى الحالات احنا فى خبأ عال

دهب أفندى : عال جداً .. مش نؤعد أحسن ؟ (يضحك)

ويشير إلى دكة من دكك الخبأ) أما دكة مافيش كده أبدأ
اتفضل يا ييه ... !

نبيل بك : صحيح مافيش كده أبدأ ... (يجلس ويضع
رجلا على رجل) ما باليد حيلة ياسيد دهب !!

دهب أفندى : فرصة سعيدة يا ييه .. كنت بحسب إن
سعادتك دلوات تكون فى النادى .. إتنو فى الميعاد ده تبتدوا
لعبة البردج ...

نبيل بك : صحيح (ينظر فى ساعته) دلوات نص الليل
أنا لسه هفت الرستوران وجاى أركب العريه سمعت الصفاير
يجترب ... !

دهب أفندى : أهو دا اللى حصل لى أنا كان ... يادوبك
سبت المكتب وحاخذ الترمای بصيت لثيب الصفاير بنقول :
توت ، توت .

قشقوش : (يتقدم منهما ، ويقول) تسرخ : توت . توت
أعوذ بالله من صوتها الفأري ياسعادة اليه !

نبيل بك : (بترفع) مين ده ؟

دهب أفندى : دا الواد أشقوش البويجى (لقشقوش)
مين رماك علينا الساعه دى

قشقوش : الصغاره الشؤم ... الشاويش جاني غصب عني
ونزلي هنا ... أهو تعطيل أشغال والسلام ... عليك العوض
يارب ... !

نبيل بك : (لذهب أفندي) ماناخذش منه وتدي ، مش
نائصنا إلا نرغي مع بويجي كان ؟

قشقوش : (لنيل بك) الله يسامحك ياسعادة اليه ... دا
من بنحي اللي أنا وياكم (يتقدم بصندوقه) والنبي لنا ماسح
جزمة سعادتك ... سفتحنى يايه . ربنا يجعل نهارك إسطه ،
ويخلصنا على خير ...

نبيل بك : إمشى ياواد ... بلاش قذاره
قشقوش : طيب يعني ...
نبيل بك : إمشى ياواد ...

قشقوش : (يتقهقر - يضرب بفرجونه الصندوق)
الأمرك ياوخيمه زراه ... يارب ، يامفرج الكرب !!
(نبيل بك وذهب أفندي يتحدثان بصوت غير
مسموع . يظهر شكيب ومحاسن)

شكيب : (لمحاسن) انخبأ متين ... مش كده والنبي ... أدحنا
انفرجنا عليه كله ... يلا بينا نستريح بأه ... آهي أعدوه والسلام

محاسن : (ساعة مفكرة) بس أبويا ... أمي ... عايزه
تخرج نشوفهم راحوا فين ...

قشقوش : (يتقدم من شكيب) جريفن أصلي .. تمسح
يايه ... مسحه بالشرف ... !!

شكيب : (لقشقوش) أمسح! ... انت مجنون ياواد انت ،
صحيح المزاج راينء أوى للمسح!

قشقوش : بتعمل كده ليه يايه ... حط ف بطنك بطيخه
صيفي ... مافيش خوف ... إحنا ف أمان ... !

محاسن : (لقشقوش) اسمع ياواد أما أولك ... (تلفتت
إلى شكيب) مش أحسن نبعت الواد ده لحد باب السينا يشوف
بابا وماما ... ?

شكيب : (لقشقوش) تعرف ياواد تروح السينا الاربييه
من هنا ، وتشوف الاتمبل نمرة ... (يلتفت إلى محاسن)
نمرة العربية كام ؟

محاسن : ١٥٤٠٩

شكيب : (متما حديثه مع قشقوش) العربية نمرتها
١٥٤٠٩ فان لبيتها تسأن السواء تؤول له : فين صبرى باشا
والست بتاعته

قشقوش : غالى والطلب! رخيص يايه ... بس أخرج ازاى

محاسن : حديق نص فرنك ... !
شكيب : لا ... أنا ادّيلّه شلن إن اجّد عن وراح ...
قشقوش : عايزني اروح ف شربة ميه ... دى الروح
حلوه يا ييه ... !

(يرى فهم الخشن وبهجت الناعم يهبطان الخبا :
الأول معه حقيقة سفر قديمة . قشقوش يتابع حديثه مع
شكيب بك) بص ... بص ... آدى وارد جديد (يوجه
الكلام إليهما) مرحب . مرحب ، اتفضلوا !!

فهم الخشن : (لبهجت الناعم) ما شفتش يا حضرة جمهور
غريب الأطوار ، شاذ الطباع ، زى جمهورنا ده ...
بهجت الناعم : أصد حضرتك إيه ؟

فهم الخشن : أصدى طبعا يا حضرة الشيء اللى بنشوفه كل
ساعة فى كل حاجة ... أصدى الاهمال ... أصدى التهاون ...
حتى ف وأت الزّناّه ... الناس ماشيين يتلكعوا وهم رايمين
الحجاء ... تتولش رايمين سينا ولا صاله ؟

بهجت الناعم : وعلشان إيه السرعة ؟
فهم الخشن : علشان إيه السرعة ؟ إحنا ف حالة خطر
يا حضرة ... !

بهجت الناعم : (يرسل ضحكة عابثة) خطر ؟ ! يا سيدى
 قفّضك (ينظر إليه مدققاً) الظاهر إن دى أول صفاره
 تسمعها حضرتك ... !
 فهمي الحشن : أنا لسه جاى من الريف ... وأنا فى الترمّاي
 فاجتني الغاره ...
 بهجت الناعم : وحضرتك شرفت من الترمّاي على هنا
 طوّالى ... ؟

فهمي الحشن : مصادفه عجيبه للغاية ...
 بهجت الناعم : الدنيا كلها مصادقات ... وإيه رأيك بأ فى
 الخبأ ؟ بزمّتك مش شكله ظريف ؟
 فهمي الحشن : المهم انه يحمى الانسان من خطر القنابل
 وخلاص ... !!

بهجت الناعم : يا سيدى سيدك ... العمر واحد ، والرب
 واحد ... !

فهمي الحشن : عجيبه انك مش سائل ، ولا كأن فيه حاجه ...
 دا شيء ما يمشيش مع الطيعه البشريه الى أوضح ما فيها غريزة
 حب البقاء . والغريزه دى تظهر فى الحيوان جداً . . . خد بالك
 من الأوط أو الكلب ثلاثيه يهرب فى مكان أمين إذا حسن بأن
 فيه خطر أو هناك حدّ بهاجمه ...

• (بهجت الناعم يضحك)

محاسن : (لشكيب) يا ترى ياربى همّ فين دلوات ؟
شكيب : يعنى حيكونوا فين ... لازم مستخيين ف مكان
كويس ...

محاسن : دول همّ ألبهم ما يستحملش حاجه ... ودايما
يثولوا ياترى ياهل ترى ... لازم مخضوضين على !
شكيب : ليه ما هم عارفين إننا سوا ... هو أنا مش خطيبك
يا محاسن ، وانحيك يعنى ، وهم متاكدين من كده ...
ما يكونش عندك فكره من الجبهه دى .

(يأخذ يدها ملاطفا فتجذبها على عجل ...)

محاسن : سيب إيدي ... !

نبيل بك : (لدهب افندى) ١٥ / ١٥ ... كثير ...
كثير يا دهب افندى ... انت مشدأوى ... !!

دهب افندى : (وهو ينظف نظارته ويضعها ثانياً على
أنفه) والله يا بيه انت الكسبان مش انا ... دى حركة التسليف
نايمه نوم فظيع ... الناس خايفه على فلوسها ، والحاله الدوليه
على كف عفريت ... !!

نبيل بك : مفهوم يا دهب افندى مفهوم ، ولكن برضه

١٥٠. / كثير خالص ...

ذهب افندى : انت صاحب اديم ، وما يصحش ايني اشدّد
معاك ... ١٤ ١ / مبسوط يايه ...

(يتفاوضان في عقد قرض)

(يدخل الخبأ فوج آخر دفعة واحدة ، مكون من
عفاف ، وهي غانية من غوانى الملاحى ، فى يدها محفظتها
وزجاجتان ملفوفتان ، ووراءها «بسبوسة» .. امرأة من
نساء الطبقة الدنيا ، « والقولى » الفتوة بائع الكمك ، وهو
يحمل سلته ، وخلف هؤلاء « الشيخ عميدشة » الأبله
الأخرس ... يسمع صوت رجل من رجال الشرطة ، وهو
يصيح بهذا الفوج أن ينزل سريعاً)

قشقوش : (متجها نحو بسبوسة والقولى وعميدشة ،
يرحب أولاً بالقولى) ياميت مرحب بالمعلم قولى ، آنست
يا فتوة البلد . الحته نورّت بعيونك يامعلم . (القولى يسلم عليه
بتعاضم ، وهو يقتل شاربه : قشقوش يلتفت نظره الى
بسبوسة) إنت معانا يا خالى بسبوسة ... سلامات ... اتفضل

يا خالتي استريحى ... ف عنيّنا من جَوْه (ينظر إلى الشيخ
عميشة) وكان سيدنا الشيخ ؟ (يقبل يده) دا الطّام
كُمْل ... وحيّاة ديني ما حيحصل لنا حاجه بازن واحد
أحد ... ما دام اناّمينا كده ... دا الشيخ عميشه والأجر
على الله يا عم ... !!

(القولى يضحك بتعاضم واستهزاء)

بسبوسة : (لقشقوش) ربنا ينفعنا ببركاته يا بني . بس
ياروحي يا عالى الواد ابن بنتي ضاع منى على الرصيف ... تكسبشى
سواب في خالك الغلبانه وتروح تشوفولى ...
قشقوش : دول محرّجين ما حدش يخرج يا خالتي ...
مفيش جنس واحد دخل يئدر يعتب على الباب الا بعد ما بيان
ياضها من سوادها ... وخايفه على إيه؟ حطى ف بطنك بطيخه
صيقى ... ابن بتك دلوات ثلاثيه فرحان ومزأطط مستنى الطيارات
لما ترن ف السما زى النحل ... ياما حيسأف ويعمل له هيله وهلوله ،
ياريتنى معاه يا خالتي تفرش سوا ... !

(عميشه فى هذا الوقت تنزلق قدمه ، فيقع متدحرجاً
على السلم . تنظر إليه غفاف ثم تضج بالضحك .
قشقوش يبادر بأقالة الشيخ من عنقه ، وبسبوسه تساعده

وهي تبرك بالشيخ . عفاف تضع الزجاجتين الملقوفتين
في ركن)

فهم الخشن : (لهجت الناعم) بص ياسيدي خدلي بالك
شوف التشكيله العجيبه اللي معنا ...

بهجت الناعم : (وهو يشير إلى عفاف) انت ماتعرفش
عفاف نجمة السيما ؟ ماشفتش صورتها أبداً في المجلات ؟

فهم الخشن : (بتحفظ شديد وهو يرمق الغاية بعين
الاحتقار) أنا يا حضرة مش من الصنف اللي يشغل باله
بالحاجات دي ... !

بهجت الناعم : (وهو يحدق في عفاف) يعني ماشفتش في
الريفيو دُرّها التانجو المشهور . ياللي سثني الغرام ؟ ... دا الناس
على المسرح بتجنن لما سمعه ، وكل ماتخلص يثولوا لها من تاني
فهم الخشن : وهو جمهورنا له زُوء ... دا جمهور منحط يا حضرة
بهجت الناعم : لا ... اسمح لي بأ ... من فضلك شويه !!
فهم الخشن : وهو أنا ألت لك حاجه غلط يا حضرة ؟ أصدي
أؤول ان الجمهور اللي يجب الأدوار اللي من النوع دا جمهور
ماعندوش زُوء ... جمهور منحط !!

بهجت الناعم : علي كل حال الدور دا دور جميل والسلام
والناس معزوره لما بتجن ساعة ماتسمعه ...!!

(وقد لاحظ أن عفاف واقفة تدور بنظرها في
المكان فيتقدم منها ، ويقول لها :)

اتفضل هنا يا آنسه ... !

(ينظف لها بمنديله مكانا على دكة من دكك الخبأ ...)

عفاف : مرسى ... مرسى أوى ... بس ... !
بهجت الناعم : يا بن عليك خايفه ... مايكونش عندك
فكره ... الخبأ في غاية ونهايه ... مفيش خطر علينا أبداً ...
عفاف : بس حكاية الغارات دى شيء يدايه ويمكنين
المزاج ... !!

بهجت الناعم : دى حسبة ربع ساعة وربنا يفرحها ، كل
واحد يروح لحاله ... ونبأ على وش الدنيا ...
بسبوسة : على وش الدنيا ... على ضهرها أهى مصيبة
وانحطت على دماغتنا ... (تتقدم من القولى بائع الكعك) والنبي
يا بنى ماتتدرشى تخرجني من هنا يُسَوِّبَك سَوَّاب ؟
القولى : (بغطرسة واحتقار) أخرجك ... إيه هو
الكلام دا ياوَلِيَّه ... اسكتى ... اسكتى ...

بسبوسة : دانا غلبانه يا بنى اعمل معروف فيته ... دلى

أخرج إزاي غلشان أدور على ابن بنتي اللي تاه من إيدي ...

(تمسك بيده ، فيدفعها)

القولى : ابعدي عني ... أما صحيح مره عمّاله تخرف !

بسبوسة : (وقد تركته ، تعغم) يا ترى انت فين

يا فتوّه ؟ !

القولى : ابن بنتك اسمك فتوّه ؟ عمره أد إيه ؟

بسبوسة : واد يتيم الأب والأم ، يا حمره عليه يا ابني ، أنا

اللي ربّيه يا ضناى !!

القولى : (يرفع صوته بقوله) بثو لك عمره أد إيه ،

ما تردّي ... !

بسبوسة : لسه يا حبيبي يا خويا داخل فى التسعه ...

القولى : ابن تسعه وتسميه فتوّه ؟ أما عجيبه على

الخللاي دى ، أمال احنا يئنا اسمنا إيه بأه ؟

(يدفعها بقسوة)

قشقوش : (للقولى متملقا) والله الخبا نور بوجودك

يا معلم ، ثشولشى الأمر ليلة اربعتاشر ... تحب أمسح لك

البلنقه ؟

القولى : (بكبرياء ..) وقد وضع سلتة جانبا ، واعتمد

على الحائط ومد قدمه للمسح الأخرية)

أرب ياواد ، بس امسح كويس ، لحسن هيه !
قشقوش : (وقد بدأ بمسح بلعة القولى) ياسلام يا معلم ،
بلغتكَ قوء راسى ... هو أنا أنسى جمالك ... دا كله من
خيرك يا معلم ... !

(القولى يقهقه ، وهو يقتل شاربه ... قشقوش
ينهمك فى المسح : الشيخ عميشة يتشاءب فى صوت بشع)
عفاف : (لهجت الناعم ، وهى تشير إلى عميشه)
مين الراجل ده اللي شكله يشرف ... ؟
بهجت الناعم : دا راجل مجزوب ... اللي الناس العبطا
يشولوا عليه ولي من أولياء الله ...

(عفاف ترى إلى عميشه نصف قرش ، فيلتقطه كما
يلتقط الكلب قطعة من اللحم . يتهمج ويضحك)

عفاف : مسكين والنبي ...
بهجت الناعم : ألبك رثيئ أوى ...
عفاف : صحيح أنا ما أحبش صنف الشحاتين والجماعه
اللى بيريتلوا ، ويشولوا عليهم مجازيب ، ولكن الحما أنا مش
طارقه ليه شايفه الراجل ده يستحق الاحسان ... ؟

بسبوسة : (تتقدم من عفاف) تَدَيْنِشْ أنا رخره إرش .
ياشابه ؟ ليته ابن بنت باجرى عليه ، وتاه عن عني ساعة
الصفاره ماضرت . إديني ولو إرش لله يابنتي ..

عفاف : على الله ... !

(وفي هذه اللحظة نجد القولى قد انقض على الشيخ
عميشه ، وأمسك بيده يريد أن يأخذ نصف القرش منه .
تقوم معركة صامته بينه وبين عميشه . سرعان ما نجد
القولى قد نجح فى سلب الشيخ نصف القرش ثم طرح
الشيخ على الارض . عميشه يندفع فى البكاء بيله ، وهو
يهدد القولى ..)

عفاف : إيه اللى حصل ... ؟

القولى : (وهو يشير إلى عميشه) كان حايزل على إيدى
يُعضها زى المسروع لحئت تقسى ... !
عفاف : وكان جيعضها ليه ؟

القولى : (متضحكا) أنا عارف ياست يمكن جنونه هيأله
حاجه (عميشه مايزال يولول ، وهو يهدد القولى . القولى يصيح
فيه صيحة شديدة ...) هُسْ بَأْ ياراجل مش عايز اسمع صوتك
لحسن أطلع كر شك ... !!

(عميشه يخاف ، ينكمش مجمباً ، القولى يضحك

ملء شذقيه ...)

بسبوسة : (لقشقوش جانباً) إنت مش شفت الراجل ده

وهو ياخذ الارش من الشيخ عميشه ؟ مش كنت تحمى عمك

الشيخ ؟ إخص عليك ... !

قشقوش : إنت ياويله عايزانى أتحاني مع المعلم القولى ؟

دانا شفت بعيني لما هجى على أبو طائيه العتر فتوة حتننا وألح

عينه بصباعه أدام الخلاء !

بسبوسة : ألح عليه ... ؟!

قشقوش : والله ياخلى بسبوسه ... شفت عين العتر في

كفّه تؤولش جوهره شاربها من المسقط ... ؟

بسبوسة : ياساير يارب ! ... الشر بعيد يا بنى ... !

قشقوش : وشفته مره تانيه والحسناء حامية بين طافته ،

وطايفة المعلم السهبانى ياخذ راس عيل يدشها على رصيف الشارع

تؤولش ييكسر بطيخه ؟

بسبوسة : راس عيل ... ياخفيظ يارب ... يا ترى إنت

فين دلوقت ياقتوه ، النبي حارسك وحافضك ... ألي عليك

لهاليب يا ابن بنتى يا غلبان ... !

(تبهل إلى الله . عفاف وبهجت الناعم يضحكان ...)

ينظر كل منهما الى الآخر ، يتسلمان بلا كلام ثم يضحكان
ثانيا .. بهجت يمسك بيد عفاف ويلاطفها .. عفاف تضحك
ضحكة مستهترة طويلة ...)

بهجت الناعم : الله ... ضحكك ، فشر نقات مزيك ... كان
ضحكك والني ، خلى اللهم اللي احنا فيه دا يتزاح ...
عفاف : عجبك أوى ضحكى ... إن كان على كده خد زى
ما أنت عاوز ...

(تضحك ويضحك الناعم ...)

بهجت الناعم : إلا تلعيش معاى جوز ولا فرد ، أنا ف
جيبى شوية شكولاته وملبس نلعب عليهم ...
عفاف : ورّينى ياخويا ورّينى ...

(يأخذان فى اللعب ثم يمسك يدها بعد حين)

بهجت الناعم : تسمعى !

عفاف : (بدلال) أوه !!

(بهجت الناعم ينحنى على يد عفاف ويقبلها بحماسة ،

ينظر كل منهما الى الآخر مبتسما . يضحكان)

شكيب : (وقد شاهد هذا المنظر يقول لمحاسن خطيبته وقد
أمسك يدها) تسمعى ؟

محاسن : (تجذب يدها بشدة) أرجوك ... أرجوك ...
آه ياربى ... إمتى تخلص الغاره دى !

شكيب : أنا بادعى إن رتنا يطولها ... !

محاسن : شكيب ! ... إنت بخلينى اتفرز بالكلام ده !
شكيب : دى أول مرة من يوم ما اتخطبتنا نختلى فيها ببعض
دا يوم المنى عندى ... !

محاسن : إنت بتقول إيه يا شكيب ... أنا ما كنتش أفتكر
كده ... اختشى بأ ...

شكيب : ياستى ماتيكيش بأسية ... إحتاد لو آتى مخطوبين ،
وبكره نبتا لبعض ، بتعمل فى كده ليه ؟ مش كفايه على
اللى بدوءه من أبوك وأمك ؟ هم عمرهم قاتونا لوحدا ... دول
مراثينا ومطلعين روحى !

بسبوسة : (تقترب من بهجت الناعم وهو يحدث عفاف)
والنبي يابنى تاخذ إيدى ، الله ياخذ بايدك وتدلنى ع الباب ...
ابن بنتى فته على رصيف الشارع ، ولا انا عارفه جرى له إيه فى
الوحسه السوده دى ... !

بهجت الناعم : (وهو منهمك يحدث الغانية) على الله .
بسبوسة : الواد فتوة لاله أب ولا أم ، يا عيني مالوش حد
غيرى ... أنا فى عرضك ياسيدى ربنا ما يفضح لك وإليه ...

بهجت الناعم : (يلتفت نحوها وينهرها) يا شيخه أأت لك على الله ... ؟ !

عفاف : (لبسبوسة) خدى حنة شكولانه وروحى فحالك

بسبوسة : يا بنتى هو أنا عايزه شكولاته ... ؟

بهجت الناعم : أمال عايزه إيه ؟

عفاف : يمكن يكون نفسها فى حاجه ماحناش قاهمينها ..

(تميل على بهجت الناعم ، وتسريه كلمة ، ثم تضحك)

ضحكة مدوية . بهجت الناعم يشار كها فى الضحك)

نبيل بك : الآنسة دى باين عليها مزأططه أوى ...

دهب أفندى : دى عفاف ، كوكب المسارح على سن ورمح

(تميل على أذنه ويبدأ يروى له شيئاً)

بسبوسة : (لبهجت الناعم) الواد النبى حارسه وحافضه

تاه منى على الرصيف ومانيش عارفه جرى له إيه ؟

بهجت الناعم : (وقد رفع صوته متضايقا) طيب وعاوزانى

أعمل لك إيه فى النبى حارسه وحافضه ابن بنتك ؟

بسبوسة : عايزاك تخرجنى على وش الشارع .

(بهجت الناعم وعفاف يفرقان فى الضحك)

بهجت الناعم : (لبسبوسة وقد أخرج ساعته ونظر فيها)
يادوبك فاضل خمس دآنيء ونخرج كلنا ، روجي استريحي بأ
بسبوسة : ربنا يبشرك بالخير . (تتجه نحو الشيخ عميشه
وتجلس صاغرة تقول) ادعى لنا ياسيدنا الشيخ عميشه .

(يغمغم طويلا ، ثم يرسل قهقهة تتجلى فيها البلاهة)
بسبوسة : كلك خير وبركة بالصلا على النبي .. كلك خير وبركة
(تأخذ يده وتقبلها مرارا وتضعها فوق رأسها)

(شكيب يأخذ يد خطيبته على حين غرة ويقبلها بحراة)
محاسن : (وقد استفزها الغضب) لا ، لا . ما أدرش
أأعد هنا أكثر من كده (تتجه نحو الباب وشكيب يغممها)
سبيني ، سبيني ، لازم أخرج ...

بسبوسة : صحيح والنبي لك حأ ، لازم نخرج ، بلاينا يلا
(تهيأ للقيام) أروح أدور علي فتوه ... فتوه ابن بنتي النبي
يحرسك يا ضنای ...

القولی : (يصيح فيها) يا وليه أنا أات لك ما فيش فتوه

غيرى أنا ... سامعه ؟! (يرفع المصباحها)

بسبوسة : سامعه يا ابني سامعة ما تزعلش .

نبيل بك : (نأثراً) أعوز بالله ! أعوز بالله ! دايما خوتة

وخناء ... (ينظر في ساعته) أف ... !!

ذهب أفندى : (يميل عليه) عفاف بنت لطيفه ... !

نبيل بك : (يتجفط) لطيفه جداً .

ذهب أفندى : ليه ما تاخذش بالك منها و تمازجها ... !

نبيل بك : أمازجها ؟ انت عاوز تخرب بيتي ! كفايه الديون

اللي راكبه على صدرى .. أنا نأص !

ذهب أفندى : أنا أصدى تسليه بنس ...

نبيل بك : (ينظر في ساعته) أف ... ! أف ... !

ذهب أفندى : المسألة ماتستاهلش ... انك تداني لحد

كده ...

نبيل بك : أبوه ماتستاهلش ... بص (يشير إلى الموجودين)

ماحصلش أني أعدت وى شوية لمامه زى دى أبدا ...

فهم الخشن : (لنبيل بك) لمامه ... أصدك مين يا حضرة ؟

نبيل بك : (وهو يسير ذهاباً وإياباً ، ويداه معقودتان إلى

ظهره ...) أصدى دول ... إنت مش شايف إحنا آعدين

وى مين ؟

فهم الخشن : لك حأ ... مجموعه ماتشرفش ، لكن نعمل
إيه ؟ دا حكم الظروف ... وأنا مش عارف إيه مايراعوش في
المخايء ، نظام الطبقات ؟ النظام ده موجود حتى بين طوائف
الأرؤد والنسائس ، تلاً فيها طبقات ، فكان الواجب أن
الحكومة تاخذ بالها من الحكاية دى وتعمل المخايء درجات
ماتخليهاش سلطات ... !

بهجت الناعم : (وقد صدمت الجملة أذنه ، يلتفت إلى
فهم الخشن) درجات ؟ درجات يعني إيه ؟ توصد يعني المخايء
تبأى زى بواير السكة الحديد : ترسو وسكندو وبريو ... ؟
فهم الخشن : وليه لأ يا حضرة ؟ الناس مآ مات يا حضرة !!
بهجت الناعم : يعني أصد جنابك تدخل نظام الطبآت حتى
في المخايء ... !

نبيل بك : طبعاً ، لازم نظام الطبآت ياخذ حدوده في كل
مكان ...

بهجت الناعم : ولكن يا يه دا العالم دلوات ييمحى القروء
بين الطبآت ...

نبيل بك : لأ ، دا تغيب وعبط ...

فهم الخشن : مش عبط وبس ، دا جهل مركب ...

بهجت الناعم : عبط وجهل ... ؟ ؟

فهم الخشن : أmaal يا حضرة ... دا العلامة الكبير دارون
صاحب نظرية التطور يثبت بالأدلة القاطعة أن نظام الطبقات
نظام طبيعي ما فيهش أى غلط ، نظام ماشيه عليه النباتات
والحيوانات وكل شىء فى الكون ...

بهجت الناعم : إحنا مالننا وما كده ، الموضوع مش
محتاج إننا نيجر دارون ونظرية دارون ...

دهب افندى : (لفهم الخشن ، مقاطما بهجت الناعم)
إحنا لسه ما تشر فناش بالاسم الكريم ...

فهم الخشن : أنا فهم الخشن أستاذ علم الحياة والفيزيولوجيا ..
نبيل بك : فى الجامعة طبعاً ...

فهم الخشن : لا ، فى مدرسة الرجا الصالح ...
بهجت الناعم : أوه ، مدرسة الرجا الصالح الابتدائية اللي
بجى زفتى ... ؟

فهم الخشن : وحضرتك مين ؟

بهجت : أنا محسوبك بهجت الناعم !

عفاف : بهجت بك الناعم ؟

القولى : (جانبا لقشقوش ، وقد أرسل ضحكة استهزاء)

أما عجيبه ... خشن وناعم ... إنت سامع يا أشوش ؟

قشقوش : سامع يا معلى ، ما جمع إلا امّا وفّا !

(يضحك)

نبيل بك : (لهجت الناعم) وحضرتك بشتغل في إيه ؟
بهجت الناعم : بشتغل في إيه ... ؟ بشتغل في إيه ... ؟
فهم الخشن : أيوه يا حضرة ... اليه بيسألك شغلتك إيه ؟
بهجت الناعم : حأ عمرى ما فكرت في الحكاية دى .. (يتسم)
شغلتى ... (يضحك) شغلتى يا حضرات إني أعيش واصرف
على أد الاراد اللى باخده من وزارة الاوقاف ومن معاش
أبوي ... شغلتى إني أرتب أكلى وشربى على زوئى ، وأعد
لى شويه على الأهوه مع صحابى ، وكل شوية ايام أروح صاله ،
أروح سينما ، أتفرش ، وامتّع عيني بالجمال والرشاقه ...

(يقول ذلك وهو يشير إلى عفاف)

نبيل بك : يعنى باختصار حضرتك ...

عفاف : وجيه ... من الاعيان ...

(نبيل بك يدير لها ظهره وهو ينفخ متضايقا)

ذهب أفندى : (لنيل بك) لو كان معانا كنتشيه

ما كناش اتداينتنا كده ... !

نبيل بك : كنتشيه ؟ وحتلائي مين تلعب وياه ؟

(ياخذ ذهب أفندي جانبا) ولكن احنا لسه ماخلصناش
من الحكاياه لإياها ...

عفاف : (لذهب أفندي) أنا معاي كتشينه... تلعب يا ييه
ذهب أفندي : (لعفاف) عال خالص ، ألعب أوى ...
بس استنيتني شويه لما أخلص من موضوع صغير مع سعادة اليه...
(يشير إلى نبيل بك) سعادته نبيل ييه من أعيان جاردن سقى
بهجت الناعم : اللي جنب مستشفى الأصر العيني ...
بسبوسة : مستشفى الأضر العيني ... ياد هوتي . يانصيبتي
(تتجه إلى عميشه مستنجدة به وهو يضحك ييلاهة)

عفاف : (لنيل بك) حصل لنا الشرف يا ييه !
نبيل بك : ممنون يا آنسة (ثم يلتفت إلى ذهب أفندي)
بهجت الناعم : (لعفاف) تعالى نلعب سوا ... بس على
شرط ، الغالب يطلب من المغلوب كل اللي هو عازره.. والمغلوب
يطاوع ما يؤولش بم ...
عفاف : الشرط نور . . . أنا إبلت (تضحك ضحكة
لها معناها)

شكيب : (المحاسن) يَلَا بِنَا تَقْصِرْجَ بِمَحَاسِنِ

(يَأْخُذْهَا مِنْ يَدِهَا وَهِيَ تَمَانِمُ)

ذهب أفندي : (جانبا) يَأْسَعَادَةُ إِلَيْهِ الْمُبْلَغُ تَحْتَ تَصْرِفِكَ .

نبيل بك : دِلَوَات ... ؟

ذهب أفندي : تحت تصرفك في أيّ وأت (نبيل بك

وذهب أفندي يتساران . ذهب أفندي يلمح في أصبع

نبيل بك خاتما ثمينا ، يمسك يد نبيل بك ويطليل النظر

إلى الخاتم .)

نبيل بك : لا ... لا ... مش ممكن ...

ذهب أفندي : أنا بتفرج بس ...

نبيل بك : إذا كان أصدك الفرجه مفيش مانع

عندي ... خد ... (يخلم الخاتم من أصبعه ، ويناوله ذهب

أفندي فيدقق فيه النظر ...)

ذهب أفندي : مايساوبش في الوأت الحاضر أكثر من

خمسميت جنيه ...

نبيل بك : بتقول إيه ؟ خمسميت جنيه .. مايتلش عن

تسميت جنيه أو ألف .. انت مش واخذ بالك انه فص واحد

سو لثير ... مفيش فيه أى عيب ...

(ذهب افندى يضعه فى أصبعه ، ويديم التدقيق فيه ،
ثم يخرج محفظته ويعد الأوراق المالية ... مفاوضة لا تخلو
من حدة بين كليهما ... تنتهى المفاوضة بان يمضى نبيل بك
ورقة ، ويأخذ النقود ، وذهب افندى يبقى الخاتم فى أصبعه)
(قشقوش يضرب بفرجونه صندوقه ، ويقصد إلى شكيب)
قسقوش : (لشكيب) ألمع الجزمه ياسعادة اليه ... ؟

عندى جريفن أصلى ... ربنا يديم عزك يا به ...

(يضع الصندوق على مقربة من قدم شكيب)

شكيب : (ينظر إلى خطيئته محاسن ، ويكلمها بتلطف)
نجي تمسحى جزمتك ؟

محاسن : لا ما أحبش .. ما بحبش حاجه يا أخى ... اعمل
معروف واسكت عنى ...

(تذهب محاسن إلى مكانها الاول : يتبعها شكيب ...)

ياترى انت فين دلوات ياما ما ؟

بسبوسة : (واضعة يدها على خدها) ياترى انت فين يا حبة
عينى يا فتوه ؟

القولى : (بمسكها من قفاها ويهزها) يا وليّه أنا أرىتك
وحفّضتِكَ وألت لك ما تنطيش بكلمة فتوه ... أنا
حدّشدش نافوخك إن عديتها على لسانك ... !

بسبوسة : طيب ياسيدى طيب ... (تتشبث بالشيخ
عميشة وتقبل ركبته منحنية تتحب) اعمل فيّه معروف .
ياسيدى الشيخ نجّتى لى الواد ربنا مارميك فى ديكّه !
نبيل بك : سكتوا الوليه المهورسه دى ... دا عياطها ييخلينى
اترفز خالص ...

(القولى يسترسل فى ضحك عال)

دهب أفندى : (لبسبوسة) سعادة البيه يتول لك اسكتى.
بلاش خوة دماغ ... !

بسبوسة : حاضر ياسيدى حاضر ...
(تنغمم بالبكاء وهى محنية على قدمى الشيخ عميشة .
يأتى قشقوش ماسح الأحذية ويتبرك بالشيخ ماسحاً يديه
على ثوبه)

فهم الحشن : (النبيل بك وهو يشير إلى عميشة وقشقوش
وبسبوسة) بص يا ييه بص ... بزمتك مش منظر من مناظر

القرون الوسطى ؟ إله مزيف بين اثنين من اللى يعبدوه ... 1

نبيل بك : فى الحثيثة ان دا شىء مخجل جداً ...

فهم الحشن : دا كله من التعاليم الدينية اللى بتسمم العنول
وتخلى الجماعة المغفلين دول يخضعوا لها .

بهجت الناعم : (يلتفت اليه وقد سكت عن اللعب وقتاً)

دى كلها خرافات مالهاش دعوه بالدين أبداً ...

فهم الحشن : آهى نوع من العبادة والسلام .

بهجت الناعم : العبادة فى حثيثة أمرها رياضية نفسه كويسه
ما فيش منها ضرر ...

فهم الحشن : آهى كلها خزعبلات يا حضرة !

القولى : (لفهم الحشن) إيه هو الكلام ده اللى عمالين

تتفلسفوا فيه ، دا احنا هنا على كف عفريت يا رحمن يا رحيم .
اعتبروا ، وأولوا يا رب ! يا منجى !

فهم الحشن : (لهجت الناعم) أنا حر الضمير يا حضرة
ما أخضعش إلا لسلطان على ...

(نبيل بك ودهب أفندى يضحكان ساخريه من بهجت)

الناعم . القولى يخطر ذهاباً وإياباً وهو يفتل شاربه ...)

بهجت الناعم : حر الضمير ! لا مؤاخذه يا أستاذ ! اللعب
أحسن من الكلام فى الحاجات دى ...

عفاف : (لهجت الناعم) إلا والنبي سلطان عأله ده يساوى إيه
بهجت : (لعفاف وقد عاد إلى اللعب) أهو أدامك أسأليه
(يأتى قشقوش ويعرض على بهجت الناعم وعفاف
أن يسمح لهما الحذاء . عفاف تضحك وتضع قدمها على
الصندوق ، ويبدأ قشقوش فى المسح ...)

قسقوش : (لعفاف) وحياة مأم النبي ما أنسى طول حياتى
يوم ما سمعت سعادتك فى الرديو وأنا فى أهوة المعلم خليفه بتغنى
دور : « ياللى سيئتني الغرام ... » دى الحته كلها كانت مكبكة
على الأهوة لحد المعلم ما خاف من الزحمة بعث جاب عسكر يفرءوا
الخلا ... !

بهجت الناعم : شايفه ؟ ... انتصار على طول الخط ...
(عفاف تضحك .. قشقوش يخرج من جيبه أداة موسيقية
صغيرة للنغم ، ويبدأ يصفر فيها لحن : ياللى سيئتني الغرام)
بهجت الناعم : (لعفاف) يعنى فيها إيه لو غنيت لنا الدورده ؟
عفاف : ياسلام يا بهجت ! أغنى فى المنجأ ، أما عباره ... !
القولى : وليه لا ياست ؟ هو عيب ... وليه مانيسنش انا
جدعان ألوبنا من حديد ، مانخافش لا غارات ولا دياولو ...

قشقوش : (للقولى) يسلم فك يا معلم .. آهى كده الفتونه ..
أ يوه لازم الست تغني على حسك يا معلم ...

بهجت : (لعفاف) أنا حاطبط لك الوحده بالتأ رزى كده ..
(ينقر على خشب المقعد)

(القولى يتقدم من عفاف ويلح عليها فى الرجاء ... هى
تضحك ...)

فهم الخشن : (مغمغماً) أما صدأ اللى آل ان الانسان
حيوان طروب ...

(عفاف تغنى :)

باللى	سئيتنى	الغرام	إملا	كان	كاسى
نسبت	عهودى	أوام	ونا	الى مش	ناسى
حرمت	عينى	النام	يا ألبك		الآسى

ياللى	جـمـالك	فتنى	أدى	زكاة	الجمال
ياما	نديتك	يلحنى	كفايه	منك	دلال
إبعت	خيالك	يزرنى	يشوف	أصاده	خيال

ياللى	وصالك	دوا	هجرى	شغل	بالى
إرحم	فؤاد	انكوى	واعطف	على	حالى
شفت	الحبايب	سوا	عؤبالى	،	عؤبالى

(الجمع يلتف حولها، تبدو حركات طرب من القولي
وقشقوش وذهب افندى الذى نراه يتمايل طرباً ويحدق
فى الخاتم الذى أخذه من نبيل بك ...)

(ينتهى الغناء ، فيصفق الجمع فى خفة . أما نبيل بك
فيظهر تصفيقه فى عظمة وهو يضحك ضحكته الأرستقراطية)

بهجت الناعم : (لقشقوش) واد يا أشئوش ... اشتغل

ياواد بالمزيكه بتاعتك ... (لعفاف) مش تنوم نرؤص ؟

(يرقصان ، يشيع الجبور بين الحاضرين)

شكيب : (لخطيئته محاسن) يا بنجهم ... ياما بتمنى

وياك رأسه زى دى ... !

محاسن : إنت فاكرنى زى البنت بتاعت التيارات دى ؟

لا ، أنا مش من دول ... أوم أرؤص معاها إن كانت

على كيفك ... !

شكيب : بئولك عاوز أرؤص معاك انت ...

محاسن : معايا هنا ؟ ليه ؟ جرى لعآلك إيه ؟ أرؤص

أدّام الناس دول ؟ ياسلام ! ياسلام !

شكيب : إنت أصدك تضيعى الفرصه الحلوه دي . دا

الرأص متحرم علينا بأمر امك وابوك، واحنا هنا ما جِدش
تَعْرِفنا ... يلا يلا ... خَلينا تَقْرَفش !

محاسن : سيني ... ألت لك سيني ... !

بهجت الناعم : (لمحاسن وهو ما يزال يرقص) الهانم
مش راضيه ترؤص ليه ؟ هو الرأص مش أحسن من أعدتها
كده مد آياه نفسها ؟ !

(محاسن تشيح بوجهها عن بهجت الناعم) .

نبيل بك : ماشاء الله ، ماشاء الله ، ... ! المحبأ إنا لب
كباريه ... !

فهم الخشن : الحئيثة يا حضرة انها إلة أدب فوء الحد...
إيه الفرء بينهم وبين الأروء ؟

(تسمع بقة صيحة استغاثة من ناحية الشيخ عميشة)

دهب افندى : (وقد دب الرعب فى قلبه) إيه اللي
جى ... ؟ إيه اللي جى ... ؟

(الشيخ عميشة مسترسل فى استغاثته ، يجتمع عليه من
فى المحبأ متسائلين : ماذا جرى ؟ ماذا جرى ؟ شكيب
ومحاسن يقومان أيضا ليريا ما الخبر ، ولكنهما دائما بيميدان
عن الجمع ...)

(الشيخ عميشة يشير إشارات بأنه جائع ، نبيل بك
ودهب افندى وفهم الحشن يضجون بالسخط ...)
القولى : (وقد أطلق منجكة ساخرة) عازر يا كل جناب
حضرته ... !

(عفاف وبهجت الناعم يتسمان . قشقوش وبسبوسة
مهتمان بأمر الشيخ ... شكيب ومحاسن يعودان إلى مكانهما
السابق ويجلسان كأنهما تمثالان)

بسبوسة : (تنظر إلى الجمع فى استرحام) ما فيش معاكم
حاجة تاكل ... رغي عيش لسيدنا الشيخ يا أهل الاحسان
(الشيخ عميشة يصرخ وهو يشير إلى أنه جائع)
بسبوسة : يا ترى انت جعان ولا عطشان يا ابن بنتى يا فتى ..
تنظر إلى القولى) يا كبدى .

(قشقوش يسر كلمات فى أذن بسبوسة . يلحظ ذلك
القولى . تقوم بسبوسة إلى القولى . وتقول له :)
والنبي ياخويا تحسن على سيدى الشيخ بسميطة واحده
من اللى معاك ... سميطة واحده ينوبك سواب كبير من عند
ربنا ، وينجيك من كل ديثه ...

القولى : (لا يهتم بقولها ويتجه نحو قشقوش فيمسكه
من قفاه ، ويرفعه عن الأرض ، ويكيل له الالكيات ...)
أنا شفتك وأنت بتقول لها يا أششوش الكلب !
قسقشوش : (وهو يعول) وحياة راس النبي يا معلم ما ألت
لها حاجة ...

القولى : (وهو مستمر فى ضربه) يقول لك شفتك بجوز
عنى ... يعنى أنا كداب ؟ ولا عميت ؟
قسقشوش : طب معلمش ... تبت والنبي ...

(نبيل بك وذهب أفندى وفيهم الخشن يضجون
بالضحك . بهجت الناعم متأفف . القولى يترك قشقوش
أخيراً ، فيذهب نحو بهجت الناعم وعفاف فى انكسار ..)
بهجت : معلمش يا أششوش ... تعيش وتأخذ غيرها ...
تعالى امسح جزمة الهانم ... (عفاف تضع قدمها على
الصندوق)

قسقشوش : أنا مش زعلان يا يه ... دا معلمى ويرينى
بسبوسة : (للقولى) بأ ياخويا مش تحن على عم الشيخ
عميشه بسيطة واحده ...
القولى : والسبيطة دى يعنى مالهاش تين ... ؟

بسبوسة : دا ولى ياخويا من بتوع ربنا ... وراجل على
باب الله ، دى تباى لك سواب كبير أوى ... !

القولى : (يصيح) وهو دا فقير ؟ أمال فىن الفلوس اللى
بتنتز عليه كل يوم ؟ أيوه بيكنزها تحت البلاطه ... انت سامعه
يا وليه ؟ تحت البلاطه ؟

بسبوسة : بلاطه ؟ فىن هى البلاطه دي ؟ هو حتى له بيت
بيتاويه ؟ يا شيخ أول كلام غيرده ... !

القولى : يا ولية سدّ ثنى ده عا كم دهب ونخبه تحت البلاطه ...
(دهب أفندى يرهف أذنيه عند سماعه ذلك ...

ويتقدم من القولى)

دهب أفندى : دهب تحت البلاطه ؟ هو ... بالزمه ؟

القولى : وراس أبويا الغالى ... !

دهب أفندى : (بصوت خفيض) وهو سا كن فىن ؟

القولى : سا كن فىن ؟ هاها ... تكونشى حضرتك فاكرنى
شيخ حاره ... ؟

دهب أفندى : (يعود أدرأجه وهو يغتم) دهب تحت

البلاطه ... دا لازم حرامى ... أنا أبلغ عنه البوايس ... !

بسبوسة : (تتقدم من القولى) السميطة بكام ؟

القولى : (بقطرسة) بارش ساغ !

بسبوسة : بارش ساغ ؟ ... بعشره مليم ... ؟

(الشيخ عميشة يصيح طالبا الأكل)

بسبوسة : (تعد مامعها من الملاليم ، ثم تناول القولى إياها)

آدى خمسة مليم أم ... بزياده كده !

القولى : ألت لك بارش ساغ ... كلمه واحده ... !

برفكس ... !

بسبوسة : (تدخل يدها ثانيا في جيبيها وتدفع له ما طلب)

آدى خمسة مليم تانيين ... إنت بتعمل كده ليه ؟ ! سداً الى

آل : بضاعه ، والناس جواءه ... هات السميطة بأه ... !!

(القولى يعطيها الكعكة قهرع بها الى الشيخ عميشة)

فيأخذها منها بلهفة ، ويلتهمها ...)

بسبوسة : ياترى ابن بنتى جعان ولا عطشان ... ادعى له

والنبي ياشيخ عميشه ... !

(الشيخ عميشة يغمغم بأصوات غريبة ، وقد حشا

فه بلقمة ضخمة . بسبوسة تقبل يده)

نبيل بك : (ينظر إلى الشيخ عميشة وبسبوسة)
لو كنت دكتاتور في البلد دى ما كنتش عتأت الجماعة اللي
يريلوا دل عن ضرب الرصاص ...!

فهم الخشن : الرصاص شويه عليهم ، دول لازم يتحرءوا
بالكروسين ، علشان البلد تنصف من البلاوى دى . .

ذهب افندى : وضرورى نستولى على كنوزهم اللي
بيخبوها تحت البلاط ، علشان الناس يستنفعوا بها ... !

قشقوش : (لبسبوسة جانباً) خالى بسبوسة . . دا انت

حيكون لك سواب كبير أوى عند ربنا عشان الكعكة اللي
حنيت بها على الشيخ عميشه .. يا بخت مين ييت الجماعة شعبان ...!
(فهم الخشن يستمع إلى حديث قشقوش ويضحك)

في استهزاء)

بسبوسة : (مغمغة) سواب كبير . . ؟

قشقوش : معلوم ، دا انت حيتنى لك أصر على فى الجنة ..!

(فهم الخشن يضحك ضحكة استهزاء)

عفاف : (لبهجت الناعم) أف .. إمتى بأ ياربى نسمع

صفارة الأمان ... ؟

بهجت الناعم : أوه .. يادوبك خمس دآيئه كان ... !

(مبتسماً) انت اذابت من أعادك جنبي ؟
عفاف : لا ما اذائش بس أحب أعّد وياك في حته غيردى
بهجت الناعم : أنا حبأى ازورك في البيت . .
عفاف : أهلا وسهلا . . مرحبا بك ! . .

(بهجت الناعم يشير إلى قشقوش أن يأتي فيهرع
إليه ، فيسر إليه أمراً ، فيخرج قشقوش الآلة الموسيقية
ويعزف عليها . يقوم بهجت الناعم وعفاف إلى الرقص ،
ويتبادلان القبلات ، يدب الحماس في قلب شكيب ،
فيحتضن خطيته على حين غفلة ، ويقبلها قبله جامعة ...)
محسن : (تصفع خطيبها وتقوم مهرولة نحو الباب)
مش ممكن أأعد هنا بعد كده ... ! مش ممكن أبداً ... !
(شكيب يسرع خلفها . لا يستطيع إدراكها . يحتفيان وهما
يصعدان في الدرج)

نبيل بك : (ناظراً إلى محسن وشكيب ، ومخاطباً
دهب افندى) واحنا آعدين ليه؟ ما تيلّا نخرج احبنا رخرين ..
دهب افندى : (بتردد) أظن ما فيش ضرر ... بس
البوليس ع الباب ... !

نبيل بك : يا سيدى تفاهم وياهم ... سهرة الكلوب
ضاعت على ... !

(يهرعان ناحية السلم ، ويصمدان فى الدرج . فهمم
الخشمن متردد ...)

بسبوسة : (الشيخ عميشة) الناس بيتحولوا واحد ورا
واحد واحنا حنتعد نعمل إيه ؟ ماتيلاً بينا ياشيخ عميشه .. ؟!
(يتأيل كل منهما على صاحبه ، ويقصدان باب الخروج .
فهمم الخشمن يعتزم أخيراً أن يترك المكان ، يلحق بمن
خرج . القولى يحمل سائه ويخرج)

قشقوش : (ملتفتاً إلى عفاف وبهجت الناعم) الله .. !
تكونش الصفاره ضربت ولا سمعناش ؟ ..
عفاف : صحيح ! ... يلا بينا يلا ..

(يخرج بهجت الناعم وعفاف وقشقوش ، ولا يكادون
يصلون إلى السلم حتى تسمع فرقعة عظيمة . يتقون جزعين
مرهقين الآذان ، فرقعة أخرى أشد من الأولى ، تتبعها
فرقعات أخرى متتالية ...)

قشقوش : (صائحاً) أنايل .. أنايل ..
(بهجت الناعم يعود إلى موضعه . عفاف يمتريها نوع

من الخبل . تنظر حولها جزعة)

بهجت الناعم : (لعفاف) ما تخافيش ...

(بهجت الناعم يربت كتفها ، مطمئناً إياها . يلف ذراعه حولها ...)

عفاف : (وهي ما زالت جزعة) يا ترى أنا بل بخاً وحثيء !! ?

بهجت الناعم : (مداعباً) على أى حال ما هياش سوارىخ مولد النبي ... !

عفاف : يا حوستى . : بأ أنا بل صحيح ... !! ?

بهجت الناعم : (فى جد مخلوط بسخرية) باين يا عفاف الحرب ابتدت جد ... !

(تعود بسبوسة والشيخ عميشة فى عجلة . بسبوسة تنظر حولها نظرات مخبول ، أما الشيخ عميشة فيشرق وجهه وتلتع عيناه ، ويممه النشاط)

(تسمع فرقعات أخرى . المسكان يتزلزل)

(عفاف تحنى وجهها فى يديها ... بهجت الناعم يحاول

عبثاً أن يسرى عنها ...)

قشقوش : (يصيح باتعمال يخالطه شيء من السرور)
أنايل ... أنايل ... (الشيخ عميشة يتصايح ويصفق يديه
طرباً . بسبوسة تنطلق تنالو دعواتها ، وتبهل إلى الله
وتناجي الشيخ عميشة ، ولكنه يتركها ويقوم مع قشقوش
بنجولان في الخجأ ...)

(يعود القولى ، وهو في حالة ارتباك يحاول إخفاء
ذعره فلا يقدر . نبيل بك وذهب أفندى يدخلان في
في سرعة واضطراب ، ذهب أفندى قابض على يد نبيل
بك وهو يرتجف ، نبيل بك يحاول الظهور جهد إمكانه
بمظهر الشجاع ، ولكن صوته يخونه ...)

نبيل بك (لذهب أفندى) : يا أخى قلت لك سيب إيدى
ذهب أفندى : الأنايل عماله تتحدف ياسعادة البيه !
نبيل بك : طيب وعاوز منى أعمل لك إيه ؟
ذهب أفندى : بس نكون سوا ... إنت فى جيبك مبلغ
كويس ... ندور لنا على مكان أمين
(القولى يقعد القرفصاء صامتاً فى ركن وبجواره سلته ..)

قشقوش : (يمر به) مالك يا معلم ؟

(القولي ينظر اليه ولا يجيب)

قشقوش : (بسرور) دى أنا بل يا معلم ... أنا بل ...

ما تيجى نأرب شويه من الباب عشان نتفرج كويس ...

القولي : ابعده عني ... !

قشقوش : بيأولوا إنها بتخلّى السما نجفة متأدة ...

ويشأى شكلها أبه خالص يا معلم ... !

القولي : (يصيح متضايقا) ألت لك سيني ف حالى ...

(قشقوش يتعد عن القولي ، ويذهب يتكلم لحظة

مع بهجت الناعم . يدخل وقتئذ شبيب حاملا محاسن

وهي في حالة إغماء ، يرقد لها على الدكة ويسند رأسها بذراعه ،

تسود حر كاته الارتباك ، يدنو منه بهجت الناعم وكذلك

قشقوش — الآخرون يتطلعون ...)

شبيب : (في حيرة وبلبله) إزايك دلوات يا محاسن ؟

بعده الشر عليكى ... فؤوى يا حبيبتي ... أنت معايا ...

معايا أنا ...

يهجت الناعم : (لشكيب) هـى الآنسه جـرى لها حاجة
لا سمح الله ... ؟

شكيب : والله مانا عارف ... (يعود إلى محاسن)
إنت حساً بحاجة يا محاسن ؟ إنكلمى ... عشان خاطرى
انكلمى ... !

(يهجت الناعم يتفحص الفتاة على عجل ، يبذل مجهوداً
لا يقاظها . يبحث فى محافظتها عن شىء فيجد زجاجة عطر
صغيرة ، فيخرجها ويدننها من أنفها وهو يفرك يديها)
شكيب : دي كانت بتجرى على آخر عزمها ، وكنت
يجرى وراها عشان ألحائها ، وسمعنا الأنا بل يشقرا ع ...
خايف يكون جه فيها طراطيش من البلاوى دى ... ولكن
الحمد لله ... ألبسها يبدء .

يهجت الناعم : ما تخافش ... ما فيش حاجة جرت لها ...
بص ، أهى ابتدت تُفوء ... !

شكيب : (صائحاً) محاسن ... محاسن ... حبيبتى

محاسن ..

محاسن : (تمحديق شكيب) إيه اللى جرى ... ؟

شكيب : الحمد لله ... ما جرال كيش حاجه ... ؟

(تسمع أصوات قنابل بشدة)

قشقوش : (صائحاً) أنا بل ... أنا بل ... :

(الشيخ عيشه يطلق الأغاريد ، وهو يجول مع
قشقوش في الخبا . بسبوسة في ركن منفرد مسترسلة
في دعواتها الحارة . ذهب أفندى يسد أذنيه بأصبعيه ...
عفاف تنظر حولها في حيرة ...)

نبيل بك : (في صوت مختلج فيه رنة استعطاف ،

موجها كلامه إلى عميدة وقشقوش) اسكتوا يا جماعة .. !
اسكتوا يا ناس .. !

محاسن : (تلتصق بشكيب) ماتسينيش .. ماتسينيش ..

بس ما تتلأش في كده ... ! (تقول ذلك وهي ترداد
التصاقاً به)

شكيب : (وقد قام مع محاسن يقصصان ركنهما

المهود — يلتفت إلى بهجت الناعم ويقول له) مرسى يا به ...
مرسى أوى ...

بهجت الناعم : العفو يا أخ ... دا شيء واجب ... !
(يدخل فهمي الحشن مهرولا جزعا ، وقد تلطنحت
ثيابه بالوحل ، ووجهه ويداه بهما بعض الجراح ...)
فهمي الحشن : (وهولا يدرى أين يختبئ) شيء فظيع ،
فظيع خالص ...

نبيل بك : (بصوت متقطع النبرات) إيه ؟ أصدك إيه ؟
أول لنا ... ؟ !

فهمي الحشن : (يتلع ريقه ، ويمسح وجهه بمنديله)
ممركة في الجو هايلة جداً ... حاجة فئوة الوصف .. !

القولى : (كأنه يحدث نفسه) يا ساتر استر .. !
(بسبوسة تقصد إلى القولى وتجلس بجواره لتأنس
بوجوده بقرها . مازالت تدعو وتبهل . ينظر إليها القولى
مستعظما ، ويقول) ادعى لنا يا خالتى ... من يؤلك
لباب السما إن شاء الله ... !

نبيل بك : (لفهمي الحشن) يظهر ان الحاله شديده أوى !
فهمي الحشن : ما فيش أشد من كده ... !

(كلهم مرهقو الأذان لسماع حديث فهمم الخشن ،
حتى الشيخ عميشة فمه مفتوح ووجهه مهلل ...)
ذهب أفندي : (لفهم الخشن) إنت بتحول سُويّة
يا أستاذ ... !!

فهمم الخشن : أوكد لكم انى ما بهوّلش أبداً ... وإن
الطيارات اللى بتهاجم بيتنشن على حته مخصوصه ، والحته
دى هنا ...

(يقول ذلك وهو يشير بإصبعه إلى فوق)
نبيل بك : (فرعه يزداد) أصدك إيه بالكلام ده ؟
هنا فين ؟

فهمم الخشن : أيوه هنا ... هنا ... يا حضرة زى ما بئواك
كده ...

(عميشة يطلق أغرودة وقشقوش يتصايح)
نبيل بك : (يصيح) إعملوا معروف ماتيه صُوش كيدّه ..!
(قشقوش يصعر خده بجرأة ، ولا يعنيه شيء من
قول نبيل بك)

بهجت الناعم : (لفهم الخشن) عايز حضرتك تقول انهم
آصدين المخبأ نمرة ١٣ بعينه ؟

ذهب أفندى : مش معقول ، دا كلام مآينآ لش !
فهم الخشن : مش المخبأ نفسه ، ولكن الحته اللى فيها
المخبأ ، يعنى بالعربي آصدين العماره الكبيره اللى جنبنا ...
ما شفتو هاش وانتو داخلين ؟! أنا سمعت الناس بتقول كده !
ذهب أفندى : (وقد تشبث بيد نبيل يك) لا ، لامش

ممكّن الكلام ده يخش العأل ... !

محاسن : (لشكيب) أنا خايفه ... خايفه ... آه يارب ، وش
جانبنا هنا وزمانا الرميّه السوده دى ؟!

(يلف ذراعاه حولها . محاسن لا تمانع ... شكيب

يمسح وجهها ويروح)

(صوت قنابل أشد من ذى قبل ، يتبعه صوت

أكثر شدة ..)

القولى : يارب استرها يارب ... يا خفى الألفاف ، نجنا مما نخاف . !

قشقوش : (متحمسا) تعا نخرج ع الباب نفرج يا معلم

القولى : اعمل معروف سيني يا أشقوش ... !

بهجت الناعم : وليه ماترُوحش وياه تتهرج يا فتوة الحته
ياسبع .. ؟ 1

القولى : ياايه احتاف إيه ولا فإيه ؟ أول معايا يارب
افرجها على عيدك الغلابه ...

(قشقوش يضحك ويقصد مع عميشة إلى باب
الحبأ .. يحتفان)

فهم الحشن : (وقد التصق بالجدار) داصوت الأنايل
كل مادّه ينأرب .. ياناس ماتلموا فى حته واحده ..

بهجت الناعم : (فى تهكم) تتلم ف حته واحده ؟ ... ونظام
الطبقات يا أستاذ .. ؟ !

دهب افندى : لازم الجماعة دول اتجنتوا ..

عفاف : (مبتهله) ياست زينب ياطهره .. نظره !

بهجت الناعم : (يداعب عفاف ، فتسحب يدها منه فى

هدوء ، ينظر اليها متعجباً ، ثم يلتفت إلى الجمع)

ليه يعنى الخوف ده كله .. مش آخر ما عندهم إنتا نموت ؟

(يقول ذلك بلهجة مألوفة)

عفاف : نموت ؟ !

بهجت الناعم : وهو فيه ألد من إني أموت وانت كده
بين أحضاني ؟ ! يا سلام على دى موته غاليه . . !

(يريد أن يقبل يد عفاف ، فتمنعها عنه ، ثم
تستغرق في كآبة صامتة)

(شكيب يمسك يد محاسن ويقبلها ، لآ تمنع .)

نبيل بك : شىء عجيب ..

فهم الخشن : (مهمهما) الموت ... الموت (يصيح)

لا . . . لا . . .

ذهب أفندى : وازاى يجينا الموت واحتافى غباً زى ده !
بهجت الناعم : وهو المنجأ حيحوش الهلاك اللى بترميته
الطيارات ؟ .. إنت ما سمعش الاستاز وهو بيثول انهم آصدين
الحته دى بعينها ؟ !

القولى : ما تنف من بؤلك يا شيخ ، وتسيبونا من الكلام
ده . . أول يامنجى ارحمنا برحمتك . . !

(يشترك هو وبسبوسة فى الابتهاال)

فهم الخشن : (منعما) عايزين يهدوا العمارة اللى جنبنا
مايخلوش فيها حاجة . . آدى اللى الناس بيثولوه . . ! ولكن
احتا هنا ف أمان . . .

ذهب أفندى : أmaal إيه ؟ .. هو ده اسمه كلام ؟ ..
دا مخبأ مش لعبه .. !

(فى هذه اللحظة يسمع إطلاق القنابل بشدة .
يسقط من سقف المخبأ التراب وبعض الحجارة . يسمع
صوت بناء يتهدم . ضيوف المخبأ فى حالة فزع ، يلتصقون
بالجدران . يتوالي صوت الهدم بعنف . المكان يتزلزل
بقوة : قشقوش والشيخ عميشة يعودان مهرولين ، وملايسهما
معفرة . نرى خلفهما قطعا من الحجارة بين كبيرة وصغيرة
تنهال على المخبأ من الباب ، يتبعها سيل من التراب)
قسقشوش : (يصيح جادا) العمارة اللى جنبنا اطرّ بتمت
علينا ... !

(لا يكاد الشيخ عميشة يطلق أغرودة حتى يصيح
قسقشوش صيحة الأمر :)

اخرس ياراجل انتة .. بلاش خوته !

(ينظر اليه الشيخ عميشة متسائلا ، ثم ينكمش . باب
المخبأ يتهدم وينسد كله . يتشقق بعض أجزاء من سقف المخبأ

وينهار منه التراب ، قشقوش يصيح :
احنا حنتردم ونعيش تحت التراب إن ما كناش نلحاً نصلب
سأف الخبأ ..

بهجت الناعم : وحنصلبه بابه ؟
قسقوش : أناشيف هنا شوية لواح وعروء خشب فاضله
يظهر البنائين ما كانوش كلوا الشغل ..

(يهرع إلى مكان مهجور في الخبأ به بعض ألواح
وقوأم من الخشب ، والجمع كله خلقه ، يعودون ومعهم
الألواح والقوأم . يشتغلون بهمة في وضعها لتقوية سقف
الخبأ وحواشيه وجوانبه . قشقوش يزعم عليهم)
بزيادة كده .. آهو دلوات بأعال .. !

(ضيوف الخبأ يحففون عرقهم ويستريحون)

القولى : تفكر كده يا أشئوش ؟

قسقوش : أمال ... السأف دلوات يستحمل تؤول العماره
اللى مكر بسه عليه .

فهم الخشن : (يقصد ناحية الباب . يعود في حالة عصبية
شديدة) الحكاياه مش حكاية العماره اللى فوء دماغنا دلوات ...

المسألة نخرج إزاي ؟ ونطلع منين ؟ ما فيش باب !
ذهب أفندى : (مبيل الفكر) وانت عازنا نخرج ليه ؟
فهم الخشن : (يصيح صياح البكاء) إحنا اندفنا بالحيا ...
وخلص ... !

(صمت مرهوب)

ذهب أفندى : (يحدق لحظة في وجه فهم الخشن ، ثم
ترف عيناه ، وتقلص عضلاته ، ويتكلم كأنه يحدث نفسه)
اندفنا بالحيا ؟ الكلام دا إيه ؟

(يظل وقتنا وهو ينظر نظرا تأثما ، ثم يمد يده بفتة إلى
جيبه ، وفي سرعة البرق يخرج محفظته ويقلب أوراقها مغمما)
عشر كمبالات مستحقة الدفع بعد يومين ...

(ينظر إلى فهم الخشن ثانيا ويقول :)

وازاي اندفنا بالحيا ... كلام فارغ ... دى أو هام ... لازم
حنخرج ... لازم ... !

(نبيل بك وبهجت الناعم وقشقوش يذهبون
ناحية الباب ويتفحصونه ثم يعودون يأسيين . قشقوش .

يتركهم ويجول في أنحاء الخبأ متفقداً فاحصاً ...)

نبيل بك : (وهو لا يستطيع ضبط عواطفه) صحيح إحنا
اندفنا بالحيا ...

بهجت الناعم : (في لهجة يأس ساخر) العماره انحطت على
روسنا ... مين كان عارف كان فيها أد إيه ... يعني دلوات لازم
يكون قفوءنا تُرب ... !

القولى : (مسترحماً) مفيش حاجه نتجى بيها يا خلا ؟

بسبوسه : (مسترحة معه) والنبي حرام نموت الموت دى
يا كبدى علينا ... ياناس دوروا لنا على حاجه نخلص بيها من
الدَّيْته اللى إحنا فيها ...

بهجت الناعم : (في لهجة السابقة) مفيش غير حيله واحده ...

ذهب أفندى : (في لهفة) إيه هي ؟

بهجت الناعم : إنا نستنى بختنا ...

نبيل بك : نستنى ؟ إيه الكلام ده ؟ ... لازم نجتهد لحد
مانشوق لنا سكة تورينا النور ، مش نُعد مكشفين كده ...

ذهب أفندى : (متهاباً) أيوه ... أيوه ... أمال ، لازم
تفكر ، لازم نشوف لنا طريقته ... !

محاسن : (لشكيب) نفسي مداني*... أنا مغنوءم ...

(محاسن على وشك الاغناء)

شكيب : (وقد أسند محاسن إلى صدره ، ينشقها من

زجاجة العطر الصغيرة ، ويقول بصوت مرتجف)

خدى شمي ... شمي ... ماتخافيش أبدأ يا محاسن ... أنا جنبك ...

(ينشق هو أيضاً من الزجاجاة ، ويروح وجهه بالمنديل)

١ بهجت الناعم : (لنيل بك) عايز سعادتك تخلص من الزناة

اللي إجتا فيها دى طيب ، جرب !

ذهب أفندى : مستحيل انهم يسيونا كده ...

فهم الخشن : لازم يجوا يسغفونا ... أمال إيه ؟

بهجت الناعم : طبعاً حييجم بس مش حيلاءونا ...

نيل بك : مش حيلاءونا ... إزاي ؟ أمال حنروح فين ؟

بهجت الناعم : حنكون في عالم آخر ياسعادة البيه ؟

نيل بك وفهم الخشن : (في احتجاج) أوه ... أوه ...

بهجت الناعم : دى حرب مش لعب يا بهوات .. !

ذهب أفندى : (وهو يروح ويجيء مهتاجاً مذعوراً)

الحرب .. الحرب .. داهية الدواهي .. خراب بيوت الناس

وضياع ما لهم .. (يخرج محفظته ثانياً ، ويقلب الصكوك ،
ويقول في صوت الباكي :) خراب بيوت الناس وضياع
ما لهم ... !

(يقنهد ويخيم عليه اليأس الشديد)

عفاف : (لهجت الناعم) إنت بتكلم جد ولا بتهزر ؟
بهجت الناعم : بهزرر يا عفاف ؟ هوّ ده وأته ؟ .. إن
كنت سدأت مرة في حياتي تكون هي المرة دي !

قشقوش : (وقد عاد بعد تفقده الخبأ . يتوسط الجمع
ويقول في ثبات :) مفيش فايدة ... خروج ما فيش ...
اجنا اتحبسنا واللى كان كان ... استنوا بسا بختكم والسلام ..
(يأخذ عصا القولى ، ويعتمد عليها في وقفته ، والجمع
صامت في كمد ويأس)

محاسن : وقد أصابها نوبة بكاء وضراخ تتشبث
بشكيب ، وتضع رأسها على صدره وتقول : (إن متنا
أهو نموت سوا .. مع بعض .. !

شكيب : ما تُؤوِ ليش كده ... بعد الشر عليك ...
ما تخافيش ... لازم يكونوا جايين يسعفونا ... !

(بحفف وجهه بالمنديل)

(بسبوسة تقبل رأس الشيخ عميشة وتترك به ،
يقابل عملها بضحك أبله . عفاف تخرج من محفظها قطعة
نقود وتذهب في صمت إلى الشيخ عميشة وتعطيه إياها .
يأخذ الشيخ عميشة القطعة وينظر فيها ثم يطبق يديه
عليها ...)

بسبوسة : (تبحث متعبة في جيبتها عن نقود ، ثم تمر
أخيراً على ملهم) خد ملهم أهو يا شيخ عميشه .. (تعطيه
إياه) ادعى لنا ربنا يفتح لنا باب الفرج ... !

(الشيخ عميشة يأخذ الملهم ويطبق يده عليه ...)
نبيل بك : (على حدة ، لدهب أفندى ، مشيراً إلى
الشيخ عميشة) باين عليه راجل فئير منكسر
يستحيء الحسنة .

(يذهب إليه ويأوله قطعة نقود . الشيخ عميشة يفعل
بها كما فعل بالقطعتين السابقتين ، وهو يهمل ...)

(ذهب أفندي ينفرد بنفسه ، ويخرج نقوده الفضية ،
يعدها مترددا ، يعيدها إلى جيبه ، ثم يخرجها ، ثم يعيدها .
عند ما يرجع نبيل بك يقصد إليه ...)

ذهب أفندي : (لنيل بك) تسلفنيش إرش تعريغه
يا ييه ؟ ما معيش ريحة الفكك ... !

(نبيل بك تصدر منه إشارة إهمال ...)

محاسن : (لشكيب ، وهي تبحث في محفظتها) مفيش
معايا أروش أبدأ ... مش تدي الراجل القلاب ده حاجه
سواب لله ؟

فهم المحسن : يظهر برضه أن الراجل ده مسكين ...
يستحأ الرحه !

(شكيب يقوم إلى الشيخ عميشة ويعطيه قطعة نقود . القولي
ينتقي كعكة وقطعة جبن ويذهب بهما إلى الشيخ عميشة)
القولي : (وهو يعطيه الكعكة والجبن) مد إيدك يا شيخ

عميشه، كل بالهنا والشفاء .. ادعي لنا ربنا ينجيننا من الكرب ده !
(الشيخ عميشة ينقض على الكعكة والجبن يلتهمهما)
بهجت الناعم : (للقولى) حاسب يا معلم على الكحك والجبنه
الى معاك .. لهم عوزه يا حييى .. مين عارف احنا خنعد هنا
أدّ إيه ؟ !

(قشقوش يلاحظ كل ما حدث ، يتجه فى صمت الى
القولى ، ويمسك سلته يريد أخذها منه)
القولى : (لقسقوش) إيه دا يا أشقوش ؟ أصدك تعمل إيه ؟
(قشقوش ينزع السلّة من يد القولى ويذهب ناحية
من الخبأ ، وتحفيا هناك . القولى يحدث نفسه) الله !
الله ! فىن السبت ؟

بهجت الناعم : فى حته مستخيه .. تحت الحراسه يا معلم . !
(يعود قشقوش ، فلا يجزؤ القولى أن يطالبه بالسلّة .
الشيخ عميشة ينظر فى نقوده يتلاعب بها وقتا ، ثم يطبق
يده عليها . قشقوش يراقبه مراقبة دقيقة)
دهب أفندى : (لبنيلى بك) معاك إرش تعريفه يا يه ؟
إرش تعريفه بس .. حديهاك ساعة ما يكون وياى فكه ..

نبيل بك : (وهو يبحث في جيب صدره) ألت لك ما عنديش
أروش تعريفه . .

دهب أفندى : شوف إرش يكون هنا ولا هناك . . ولا
شوف ليه إرش ساغ . .

نبيل بك : ما فيش ياسيدي أروش ساغ.. أنا حكذب؟
دهب أفندى : طب شوف ليه نص فرنك !

نبيل بك : وبعدها لك بأى ؟ إنت مش حاتسبني النهارده
يا دهب أفندى ؟

دهب أفندى : ده عمل خير لوجه الله . . حينوبك سواب
أد ما ينوبني تمام . . ساعدني على الحكاية دي . .

نبيل بك : خد حته بخمسه .

دهب أفندى : عال أوى . . أهو انحل الاشكال ! . .

الراجل الغلبان ده حيفرح بيها أوى ، ويدعى لنا دعوة خير
تأكد اني حردّها لك يا ييه . . !

(يخطو بضع خطوات. يتوقف، يشاور عقله، يخطو خطوتين

ويتوقف. يخرج نقوداً صغيرة من أنصاف القروش ويضع

فيها القطعة ذات خمسة القروش ، ثم يختار نصف قرش ،

يناول الشيخ عميشة لياه . يعود وهو يترك يده ، يقول :)

أحسن حاجه يعلمها الانسان في عمره هي الحسنه على
الغلابه والبر بالفأرا ..

بهجت الناعم: (لفهم الخشن) كلهم ادوا الشيخ عيشه
الى لادروا عليه ، إلا انت ... له ما تديلوش حاجه .. ؟

فهم الخشن : وليه يا حضرة ما ديتوش انت ؟
بهجت الناعم : أنا .. أنا أعرف ان رحمة ربنا الواحد
ما يشترهاش بالحسنه الى بالشكل ده .. !

فهم الخشن : (وقد أمسك بيد بهجت الناعم وضمغطها
يقول في لهفة :) انت عندك ثقه برحمة الله ؟ !

بهجت الناعم: (في لهجة يقين واطمئنان وفي صوت
ممتلي) واثق جداً .. زى مانا واثق من وجودك وياي
دلوات .. !

(فهم الخشن يمدق في وجه بهجت الناعم ، ثم ينطلق
يفكر ، وهو رافع رأسه نحو السماء .)

ستار

الفصل الثانى

(ترفع الستارة عن المنظر السابق
بعد أربع وعشرين ساعة . ضيوف
المنجى وجوهرهم . تم عن إعياء ،
ملا بسهم تجعدت . ترى الرجال قد
بدأت ذقونهم تنحصر ، أما النساء
فتشعشت شعورهن ، قد هيا كل فرد
له شبه مرقد من قطع خشبية أو رمل .
الجو حيدس ، الحاضرون يمسخون
وجوهرهم بين حين وحين . جلسهم
فى تراخ ويأس . الشيخ عميشة نائم .
يفط غطيظا مزعجا . بسوسة راقدة)

. قرب قدميه . القولي مكوم بالقرب
من بسبوسة . قشقوش جالس ينظر
خوله وقد اعتمد بجسمه على الحائط
وأمسك العصا بيده . محاسن واضعة
رأسها على كتف شكيب . وشكيب
عاقده يديه على صدره ، وناظر إلى
السماء ...)

عفاف : (لبهجت الناعم ، وهي ناظرة إلى جهة أخرى
نظرة ثابتة) يا ترى الساعة كام دلوات ... ؟
بهجت الناعم : (يخرج ساعته في بطء ، ويلقي عليها نظرة
طويلة ، يتكلم في إهمال) إحنا دلوات نص الليل ... !
عفاف : (وهي على حالها الأول) إزاي ؟ نص الليل ..
بهجت الناعم : (بعد أن يتثاءب ، يتكلم في لهجته
السابقة ...) أيوه نص الليل !

عفاف : طب دحنا جيتا المخبأ نص الليل ، إزاي يكون
الوأت نص الليل بأه ؟

بهجت الناعم : (يهرش رأسه ، يتظاهر بالتفكير)
صحيح إزاي ؟ ده لغز ... ! على كل حال فيه حاجتين ، لازم
نختار واحده منهم ...

عفاف : حاجتين ؟ حاجتين إيه ؟ !

بهجت الناعم : أول حاجة اتنا نكون لسّه داخلين المخبأ
دلوات ، ويادوبك فات علينا دئيبّه ولا اتنين ... !

نبيل بك : (من جهة أخرى ، وقد سمع الحديث)
دئيبتين بس ؟ !

بهجت الناعم : (متما جملته) دئيبتين أضيئناهم في حلم
غريب ... !

نبيل بك : حلم فظيع ، حلم هابل ... !

بهجت الناعم : (وهو ينظر أمامه) والحاجه الثانيه إن
الزمن يكون اتعسّظل ، والوأت وإف لا بيتأدم ولا
بيتأخر ، أمتا فضلنا في الساعه اللي احتايها !

نبيل بك : ياناس دى حاجه تبجنن ... !

عفاف : ياترى الحئيئه إيه في الحاجتين دول ؟ !

بهجت الناعم : (يهرش رأسه مرة أخرى) يمكن الحاجة .

التانية هى الى صح ... !

نبيل بك : (وقد اقترب منهما) إنتو بتكلموا بتقولوا إيه ؟

إحنا فات علينا فى الحته الى احنا فيها أربعة وعشرين ساعه ،
ولا شفتناش نور الشمس ، ولا احنا عرفنا صبح من ظهر ،
ولا نهار من ليل !

فهم الخشن : (ييأس كبير) الشمس ... ياترى حنشوفها

مره تانيه ... ؟

بهجت الناعم : حنشوفها طبعاً فى العالم الآخر ... بس .

ثلاثى حجمها كبير ، ونارها حاميه ... !

(فهم الخشن يمدق فى بهجت الناعم ثم يرفع بصره

الى السماء ، وأخيراً يضع رأسه بين يديه فى استسلام ...)

(تقوم عفاف الى الشيخ عميشة ، وتغطيه بشملته

فى عناية)

ذهب أفندى : (وقد اتبه من نومه بفتة ، وأرهف أذنيه)

أنا سامع صوت قاس ... إياك يكونوا جاينين ينجدوننا ...

(الكل يرهفون الأسماع ، ما عدا عميشة وبسبوسة ،

فهما لا يزالان نائمين . شكيب يترك خطيته ويذهب
يتسمع ...)

القولى : (وقد انتفض واقفا) جيتين ينجدونا ...

(ينصتون ، لا يسمعون شيئا ، يحجم عليهم اليأس)

شكيب : (وقد عاد إلى مكانه ، يجلس محنى الظهر ويدها

متدليتان بجانبه) ياترى حييجو إمتى يخلصونا ؟

محاسن : (تنظر إليه طويلا) ما يهمش ... أحبك يا شكيب
أحبك ... !

بسبوسة : (تنظر ملتفتة حولها مستطلعة وتصيح فى زعر)

ينصيتى ... إحنا لسه فى المخبأ الأسود ده ؟

القولى : (فى يأس شديد وهو يضرب رأسه ييده)

أيوه يا خلقى بسبوسة ، لسه احنا فيه ... !

بسبوسة : (تمسك ييده ، وقد هزعت إليه) اعمل

معروف يا بنى خد إيدى واخرجنى بره !

القولى : أخرجك بره ؟ !

بسبوسة : (وهى تشد يده) ما أدرش أعد هنا بأه ..
أنا خلاص روحي طلعت ... !

القولى : (وهو يسحب يده ويقول لها فى لهجة يأس
واستعطاف) اعملي انت معروف وخليني ف حالى ا
(بسبوسة تتعامل على نفسها وتقصده إلى نبيل بك)

بسبوسة : (لنبيل بك) وانت ياسيدى الباشا ، تعملش
معروف فيّته وتخرجني بره ... ؟
نبيل بك : مش ممكن يا خالتى ... !

بسبوسة : والنبي ياسيدي الباشا تخرجني ...
(نبيل بك ينحيا جانبا فى لطف ، تنظر إلى دهب
أفندى تستعطفه ، تنحنى على قدميه) أنا فى عرضك ياسيدى
دهب أفندى : العاره اللي جنبنا وئعت على دماغنا ، وادحنا
يا خالتى محبوسين هنا كلنا ...

(بسبوسة تتركه)

دهب أفندى : (وقد أخرج المحفظة من جيبه ونظر فى
الصكوك . ينتقى صكا منها ويمسك به ، يلتفت إلى

نبيل بك (تحب تكسب عشرين جنيه في غمضة عين .. ؟)

نبيل بك : (وهو غير ناظر اليه) عشرين جنيه .. ؟

دهب أفندى : عشرين جنيه وانت أعدت أعدتك دى ؟

نبيل بك : انت بتكلم ف إيه .. ؟

دهب أفندى : (وقد مدله الصك ، وانحنى عليه هامسا)

كيبالة بطنيت جنيه ، أبيعها لك بميتين وثمانين .. إيه رأيك
بأه ؟ !

نبيل بك : (ينظر الى الصك ويميده اليه) لا .. لا ...

مش عاوز ... !

دهب أفندى : دى هديه بأدمها لك. وراس أبويا الغالى .

نبيل بك : (مقاطعا فى ضيق) مش عاوز .. مش عاوز !

دهب أفندى : (وهو يقلب الصك فى يده) أهو انت

تملي كده تضيع القرص اللي متعوضشى .. طيب إيه رأيك
إذا بعته لك بميتين وخمسة وسبعين ؟

نبيل بك : (يقوم تاركا إياه) ألت لك مش عاوزيا أخى .

(نبيل بك يسير جيئة وذهوبا ويداه خلف ظهره ،

ورأسه منحني فى تفكير)

(ذهب أفدى يعيد المحفظة الى جيبه فى يأس)
.. ذهب أفدى: (ينظر الى أعلى) الله يخرب بيوت اللى
خربوا بيوتنا ..

(بسبوسة تقصد الى قشقوش)

.. بسبوسة: (لقشقوش) وانت يا بنى .. ارحنى يا ضناى
وخذ إيدى لحد بره ..

قشقوش: (وقد نظر اليها طويلا فى احتقار) سبحان الله
فى طبعك يا بسبوسة ..!

بسبوسة: إنتو كلكو كده .. ما فيش حد فيكو عنده
رحه .. ما تساعدوش وليّة مسكينه ما بايديهاش حيله ..
(تصيح) ارحونى يا ناس .. ارحونى يرحمكم ربنا .. أنا حوت

(تبكي وتقصد الى الشيخ عميشة)

بهيجت الناعم: (مغمما) كلنا حنموت ياسقى ..

بسبوسة (وقد تشبّثت بجلباب الشيخ عميشة) لا.. لا..

أنا مش عاوزه اموت.. (تمرغ وجهها فى جلاباه)

محاسن (لشكيب وهى تنظر اليه فى لوعة) صحيح احنا

هنا حنوت يا شبيب ؟

شبيب : (يتنهد في يأس شديد) مين يعرف يا محاسن ؟

(يمسح عينيه) .

محاسن : (في همس كأنها تحلم) خدني على سدرك !

(هي التي تضمه الى صدرها) بوسني (هي التي تقبله في خده) .

بهجت الناعم : (في يأس ممزوج بالسخرية) :

كل ابن أختي وإن طالت سلامته

في مخبأ من مخافيء الحرب مدفون

نبيل بك : (لبهجت الناعم) وحياة أبوك يا ناعم أفندي

بلاشن الكلام ده .. هو احناف أهوه ولاف تياترو ؟ !

بهجت الناعم : ياسيدي الباشا فرفش .. ماتستعجلشن

البكا والزعل .. كلنا حنكي أرب رضينا أو مارضينا .. !

(بسبوسة تصيح باكية)

قشقوش : (لبسبوسة) إنت بتعطي عشان حتموتي ..

مأهوره على شبابك اللي حفتوتيه . يعني لسه ماشبعتيش من

الدنيا يا وليه ؟ !

دهب أفندي : إيه ده ؟ تعيط ؟ نعيط ليه ؟ لا ، أبدا ...

أبدأ .. فشر !

(يندفع هو با كيا مولولا. بسبوسة تعود الى ولولتها وبكائها)
القولى: إيه المياعه دى يا ناس؟.. هو الموت يخلى الواحد يعيط؟
لا. لا.

(يندفع با كيا مولولا)
(شكيب عندما يسمع ولولة الناس ينتبه من تبلده
واستسلامه)

شكيب : (مزعجا صائحاً) إيه دا كله ؟ إيه اللى حصل ؟
بهجت الناعم : مفيش حاجه جديده حصلت ، استريح انت ...
شكيب : يهب واقفاً، ثم يطلق إلى ناحية البكاكين يسألهم
تكونشى فيه مصيبه مستجيبه مش راضيين متولوها لى ...
ما تخبوش عني ... حيجصل إيه ؟ ماتتولوا لى ... !!
بهجت الناعم : سدأونى مفيش حاجه ... إحنا زى ما أحنأ ...
شكيب : (وهو فى نوبة محومة) لا ... لا ... فيه شر
حيجهم علينا دلوات . لازم فيه حاجه ف السكه .. الموت ..
الموت ...

(يرتمى على كتف بهجت الناعم وينشج نشيجاً حاداً
والى جانبه محاسن ...)

محاسن : (لبهجت الناعم) إدينى منديك من فضلك يا به...
 (يناولها المنديل) مرسي (تمسح وجهه شكيب...)
 بهجت الناعم: (لحاسن) دى نوبه خفيه... ماتتخضيش!
 (دهب أفندي والقولى وبسبوسة يعودون إلى ولولتهم
 ونحييمهم)

نبيل بك: (وهو يحمل أزرار قميصه بحركات عصبية،
 وقد ازداد وجهه تجمها) أنا سدرى طايء على... حتحنيء...!
 فهم الخشن: (لنبيل بك) ما يصحش نياس، لازم
 نجاهد...!

نبيل بك: (لفهم الخشن) وعازنا نعمل إيه؟
 (فهم الخشن يحدق في نبيل بك وهو ممسك بكتفيه،
 ونبيل بك ينظر إليه ثم يحتضن كل منهما الآخر، ويندفعان
 في البكاء... يتعالى البكاء من كل جانب حتي من
 الشيخ عميشة)

قشقوش: (يصيح غاضبا في تأمر) هو احنا ف ميم؟

مش نائضنا الا المعددة ا ما تسكتوا بأه !

(البكاء والنحيب يهدآن شيئاً فشيئاً)

(تأخذ محاسن أثناء ذلك شكيب من بهجت الناعم .

تحيط شكيب بذراعها ، توسد رأسه صدرها ، وتسير
وإياه بخطوات بطيئة وهي تلاطفه ...)

عفاف : (تنظر الى بهجت الناعم) كلهم خافين من

الموت ... لكن أنا ... بص كده في ... ؟ !

(تضحك ثم يحتلط ضحكها بالبكاء)

الموت يخوف ليه ؟

بهجت الناعم : (لعفاف) موت إيه ؟ إحنا بعد شويه

حنخرج ونكل السهره في بيتكم !

عفاف : (لبهجت الناعم) إيه الكلام ده يا بهجت ..

والبي تسيننا دلوات من الهزار بتاعك ده ... !

(محاسن وهي تسير بشكيب سيرها السابق ، كأنها

تنزه في بستان ، تسمح له عينيه بالنديل ، تلاطف خده ..)

محاسن : (لشكيب) ريج راسك على سدرى .. ما تخافش ..

انت مالك كده ؟ .. مخضوض ليه .. ما احناش سوه ؟ مش
دى أحسن حاجه بتتمناها ، نكون مع بعض تمللي .. ؟ !

شكيب : (يغمغم) مع بعض تمللي ؟ !

محاسن : مش ده اللي كنت بتدور عليه ومش لئيه ؟ ..
أديك طلته !

شكيب : لكن دا احنا على وش خروج من الدنيا كلها ..
ما قاضلش لنا فيها الا دآيء ... !

محاسن : دآيء : .. (تنظر ليه بشرة) وإيه يعنى ؟
دآيء أحسن من سنين وأيام ... (تحديق في عينيه طويلا ،

تقرب وجهها من وجهه ، تقول في نشوة :) خدني على
سدرك (تضعه الى صدرها بشدة) بوسنى ! (تقبله

هى بشنف ، تقول وقها على خده) حنموت واحنا كده ..
واحنا كده ... (تعود بخطيها الى مكانها الأول ...)

عفاف : (جانباً ، لبهجت الناعم) هو الموت

يخوف ... ؟

بهجت الناعم : والله صحيح يا عفاف .. الموت ما يخوفش ..
ده انتال من حاله لحاله تانيه ... انتال من عالم القيود
لعالم الخلاص ... ؟

فهم الخشن : (يقصد الى بهجت الناعم ويمسك
يده وهو يرتعش ، ويحدق فيه طويلا ، ثم يصيح :
أيوه ... عالم الخلاص العظيم ... عالم الأرواح ، لا يعرف مادمه
ولا يعرف زمن !

قشقوش : (بلهجة حقد وانتقام) أيوه هناك بين أيدين
ربنا ، وكل إنسان يتحاسب على اللي عملهم . ومن أدم شيء
بيداه النشأه !

فهم الخشن : إحنا كلنا عبيده ... يعمل فينا اللي هو
عاوزه ...

القولى : والله ياسيدى زنوبنا مهما تكثر برضك ربنا غفور
تواب . أنا سمعت العالم بيثول إن الحسنات يذهبن السيئات .
(يقبل يده ظهراً لبطن ، ثم يرفع رأسه إلى أعلى)
ألف شكرانيه على نعمتك يا مدبر الكون يا إله الخلا .. !

قشقوش : (وهو ناظر الى القولى) وأنا سمعت العالم
بيثول : اللي ييظظ عين واحد ف الدنيا تنبظظ عينه ميت مره
ف الآخره ، واللى يدش راس واحد ف الدنيا تدش دس
راسه ميت مره ف الآخرة ... ! (يهقه فى سخرية)

(القولى ينظر اليه فى جزع ، ثم يقصد الى بسبوسة
كأنه يحتجى بها ...)

فهم الخشن : صحيح ربنا عادل ، يجازي المحسن باحسانه ،
والسوء بالى عمله ، ولكنه برضه غفور رحيم ...

(يذهب من فوره الى الشيخ عميشة ويمطيه إحسانا ..)

ذهب أفندى : (ينظر الى أعلى) كلنا طامعانين فى
رحمتك يا أرحم الراحمين يا رب ... !

نبيل بك : دى رحته واسعه ، ما تضيقش على حد ، لا فى
السماء ولا فى الأرض ...

قشقوش : (موجه كلامه الى نبيل بك وذهب أفندى)
أمال ... لكن برضه فيه حساب ... كل واحد معلا من
عشره وبنه ، وكل شىء مكتوب ومسطر ... هى لعبه ..
اللى يضرب يتيم ، واللى يكسر خاطر فقير ، واللى ما يحنّش
على غلبان ، كل دول لازم يتحاسبوا .. ويتعابوا .. !
ذهب أفندى : إحنا ياما ادينا الفؤرا والمساكين ، ربنا
هو العالم ..

نبيل بك : (لذهب أفندى) طبعا انت فاكر تبرعاتى

للجمعيات الخيرية السنه دي أدّ إيه ... أنا في الناحيه دى
والحمد لله ...

بهجت الناعم : (يجيب قبل دهب أفندى) نصيبك أصر
في الجنه ... مفيش كلام ... !

دهب أفندى : أصر واحد بس ... ?

بهجت الناعم : أصر عظيم مليون حور وولدان .. !

قشقوش : (مقاطعا) لكن سعادة اليه ما يئدرش يروح
الأصر بتاعه إلا اما يمشى على الصراط اللي هوّ أراء من
الشعره وأحي من السيف ... وهيهات بأه إن مر عليه من
غير ما ... يلاّ السلامه .. !

نبيل بك : الصراط ؟ وما أدرش امر عليه بسهولة ليه يا أشوش

بهجت الناعم : لا مؤاخزه يا بيه .. أشوش له حأ !

نبيل بك : ازاي ... ?

بهجت الناعم : طبعا سعادتك واخذ بالك إن ما فيش في
الآخره أتميلات تجرى بها على الصراط كده وانت أعد
مطمئن ...

قشقوش : دا جيمشى على رجله .. لازم حشر دم !

نبيل بك : (لقشقوش) الله يسامحك يا ابني .. !

فهم الحشن : يا جماعة انتو دخلتو فى علم الله .. ربنا يبئبل
التوبه ، ان شا الله الزنوب تكون ما لهاش عدد . . !
القولى : أهو دا الكلام الجد .. العالم آل كده .. وأ كده
أدام الخلا .. !

عفاف : (فى خشوع) التوبه الخالصه تمسح جميع
الزنوب . . .

(بسبوسة تبتهل إلى الله)

قشقوش : مفيش هناك زنوب (ملتفتا إلى دهب أفندى)
التوبه ما تعملش فيها حاجه ... (يذهب إلى دهب أفندى
ويلطف كتفه) مش كده يا دهب أفندى ؟

دهب أفندى : أول اللى تتوله .. ما يهمنش .. أنا مطمئن ..
دي حياتى كلها صافيه ونضيفه . طول حياتى ما عملتش محرم ..
أ كل لؤمى تبعي وشآيه ، وباجرى على عيالى فى أمان الله ..
ومالى يفرج على الناس بلاويهم ..

قشقوش : (ساخرآ) حتفتج لك أبواب الجنة كلها ،
وحيسستآ بلوك الملائكه ويعملوا لك كوك سلاح ..
أبنا آ بلنى ..

ذهب أفندى : مش كتير على ربنا إنه برضى عنا . دنا كان
يجبى الراجل من دول غرّ آن اشوشته ، مش لائى حد
ياخد بايداه ، أطلعه من بيتى فرحان ، وجيبه ملان ورأ بنكنوت ،
يفكّ ضيئته ويصلّح حاله . . (قشقوش ينفجر ضاحكا .

ذهب أفندى يتابع قوله فى اندفاع ...) ياما فتحت بيوت
كانت حَتْنِفْلُ ... وياما خلصت عائلات من القضايح
والخراب . . . المال اللي الناس يجسدوني عليه ، هوّ اللي
نافعهم وهوّ خير وبركه عليهم . . ربنا عطاني عشان أعطي
الناس .. أمت بالواجب على ما يرام .. وألف حمد لك يارب ..!
(قشقوش يضحك)

فهم الخشن : (يقول بصوت المتألم) يتخائننوا ليه
يا جماعه ؟ هو ده برضه وأت خِشاء ؟ ! مش أحسن اننا
ننقى الدآنيء اللي حنّضها فى الدنيا ، ألوبنا صافيه لبعض ،
لاخناء ولا عراك ، ونثوم نصلى لنا ركعتين ينفعونا ، ونثول
يارب حسن الختام .. ؟ !

القولى : (فى حماس) الصلا .. أيوه امال إيه ؟ لازم
نصلي فرض ربنا اللي كتبه علينا . .
بهجت الناعم : صحيح الصلا تغسل الألوب ما تخلّش فيها

كره ولا حسد ، ولكن بس خايف ليكون فات الأوان .. !
فهم الحشن : فات الأوان ليه ؟ .. العمل الصالح أهو صالح
في أى وقت .. !

نبيل بك : نصلى جماعة يا خواتنا ..
فهم الحشن : الصلّا جماعة لها سواب كبير أوى !
عفاف : (فى إشراف) الصلا .. الصلا .. يلا

تنصلى .. وكانت قايتا الحكاية دى ازاي ؟
فهم الحشن : لما نصلى فرض ربنا يستجيب دعانا ..
القولى : ومين يكون إمامنا بأه ؟
فهم الحشن : (يلتفت حوله ، ثم تستقر عيناه على الشيخ
عميشة ، يصيح .. !) الشيخ عميشه .. ما فيش غيره .. !
نبيل بك : أحسنت .. دا راجل كله خير وبركة ..
بهجت الناعم : (متسائلا) الشيخ عميشه ؟

فهم الحشن : (لبهجت الناعم) أنا فاهم أصدك .. اسمع
أمّا أءول لك .. ياما الناس يغلطوا ف حكمهم على الراجل
الى زى ده .. والحا أن الواحد لما يشوف الواحد منهم من
بره كده ما يعرفش هو فى حثيئته إيه .. دول ناس نفوسهم
طبيه زاهدين فى الدنيا مش واخدين منها حاجه ، ومين يطول
أنه يكون له نفس زى دى .. ؟

بهجت الناعم : (متهاكاً) صحيح .. ما فيش حد ... !
(يتجهون كلهم الى الشيخ عميشه يحاولون لفهامه
رغبتهم في الصلاة وإقامته إماماً لهم ... شكيب وقد رأى
الجمع يتأهب للصلاة ، يرغب في اللحاق بهم ...)

محاسن : إيه ده ؟ رايح فين ؟ (وهي ممسكة بيد شكيب)
شكيب : إنت سمعتيهمش وهم بيتولوا انا حنصلي ؟
محاسن : (وهي مقعدة برأسها على كتفه) حنصلي ؟
... نصلي واحنا كده ... ؟

شكيب : محاسن .. فثوئي لنفسك .. واحنا أدامنا كام
ساعة يادوبك حنصليها في الدنيا دي ..
محاسن : طيب .. طيب .. بس خليك كده شويه !
(شكيب يمثل في حالة يأس واستسلام ، ومحاسن مطوقة
إياه بذراعيها ...)

بهجت الناعم : (للجمع) لكن يا اخوانا دحنا ماتو ضيناش !
قشقوش : (يقول في إهمال ، وهو يشير إلى ممر مظلم)
فيه هناك شويه ميه في الجر دل ..

بهجت الناعم : دول الشويه اللي فضلم من ميسة الشرب ،
 لازم تخلوهم .. بلكي واحد عطش .. ولا سوراً .. ١
 فهم الخشن : طيب نقيم .. دا الدين يسر مش عسر .. أنا
 حدوّر لكم على حجر نضيف ينفع للتيم ..
 (ينطلق باحاثاً في أرجاء المخبأ ... الشيخ عميشة يشير
 لإشارات مصحوبة بأصوات تدل على أنه يريد أن
 يأكل ...)

بسبوسة : يا كبدى عليه ... ما دأش حاجه من
 امبارح ... !

قشقوش : (لبسبوسة) ما دأش حاجه من امبارح؟
 ما شاء الله ... ! .. آمال فين التلات كحككات والبيضتين اللي
 خدم مني ؟ ... دحنا لو سبنا له السبت كان لهف اللي فيه
 ما خلاش لثؤمة !!

بسبوسة : يا بنى حرام عليك ، دا ماخدش إلا كحككتين
 وشويّة ملح ... وحياة مأم النبي ما خد غيرهم ... وهم
 دول كتار على عمك الشيخ عميشه ؟ إخص عليك يا بنى !
 (ثم يقول بصوت خفيض) وانت ما كلت أدّه عشر
 مرات ... !

قشقوش : بئثولى إيه يا وليه ؟ طلعى حسك امآل ... !
بسبوسة : أنا ألت حاجه ؟ بئول حرام نسيب سيدنا
الشيخ الولى بتاع ربنا من غير أكل .. آدى اللى بئوله ... !
قشقوش : (يقول بحيث لا يسمع إلا هي والقولى فقط)
ما بآش فى السببت إلا كحك واحد ... إنت سامعه ؟ آدى
كل اللى فضل لنا ... لنا كلنا ...

بسبوسة : (للقولى وبصوت خفيض) يادى النيبه ؟
كحك واحد ... صحيح يا معلم فولى الكلام ده ؟
القولى : علمى علمك ... أنا عارف ... !

بسبوسة : (للقولى) إزاي مانتش عارف بأه ، مش الست
بتاعك ، وانت عارف كان فيه إيه ؟

القولى : (جانبا لبسبوسة) أنا سبتو له ، إحسان لوجه الله ... !
بسبوسة : مانا بكش منه حاجه ... ؟

القولى : إبلت منه بالغصب نص كحك وشوية دؤه ..
بسبوسة : ودفعت تمنها زينا تمام ...

القولى : (متضايقا) ألت لك يا خلتى إني أنا إديت له السبت
إحسان لوجه الله ...

(يعود فهم الخشن بحجر يصلح للتيمم)

فهم الخشن : (وقد وضع الحجر أمام الجمع) الحجر أهه..
بلا بينا نتيمم ...

(الشيخ عميشة يصيح مطالباً بالأكل)

فهم الخشن : الشيخ عاوز إيه ؟

دهب أفندي : باين عليه جعان !..!

فهم الخشن : جعان ... كلنا جعانيين ... لكن معاد الأكل
لسه ماجاش ... إحنا لازم نوفر شويه ... ماحناش عارفين
الحكاية حيحصل فيها إيه (يوجه كلامه لقشقوش) ولكن

معلش ! معاك حاجة كده نديها للشيخ ؟ !

قشقوش : (يتكلم في إهمال ، واضعاً رجلاً على رجل)

معاً يا كحك واحد ... كحك واحد ... لنا كلنا ، غيرها
هافيش ... !

نبيل بك : إنت لازم تهزر يا أشقوش .. مش ممكن

الكلام ده ... ؟

قشقوش : الحاجات دى مش بتاعة هزارإيايه ... كحك

واحد لنا كلنا ! ... كحك واحد اللي معاً يا ... هي كل اللي

فضل ... !

(هممة استياء من الموجودين)

نبيل بك : لازم الكحك راح ...
ذهب أفندى : إحنا انسراً نا ياجماعه !

قشقوش : (يقف غاضباً ، وقد رفع عصاه بهدد)
أنا اللي سرأتكم ... ؟

ذهب أفندى : لأ أبداً ، مش أصدى ؟! لكن بس ..
نبيل بك : (فى صوت خفيض) يعنى غرضى أءول إن
السبت كان ملان ...

قشقوش : (وهو مايزال ثائراً) أدىكو كلتو اللي كان فيه !
فهم الخشن : المسألة مستوجبش كل ده ... حنفر
ف الحكايه دى على مهلنا ...

(شكيب يكون قد أرهف سمعه لهذا الحديث)

شكيب : (لمحاسن جزعاً) ما باش هنا أ كل ... إتنى سامعه
الى آلوه يا محاسن ؟ ... يعنى حنموت م الجوع ... ؟!
محاسن : (وهى فى أحلامها) أحبك ... أحبك يا شكيب ...
بوسنى ... (يريد الافلات منها فلا يستطيع) بوسنى !!
شكيب : (يقبلها قبله خاطفة وهو يقول :) هه ! (ثم

يهرع إلى الجمع ويصيح :) أنا أطالب بنصبي في الكعكة
اللى فاضله ..

قشقوش : طب تعالى وخذ نصيبك ان كنت جدع .. !

شكيب : (لقسشقوش) انت بتهدّ دني؟ حاديلك تمنها زى
ما ادبت لك تمن اللى خدته منك أبل كده ..

قشقوش : شيء ميهمش .. الكعكة معاى .. وأجمعص
جميعص فيكو ما يثدرش ياخذ منها حتة الاّ بثولى أنا !! ..
(ههممة استياء)

فهم الخشن : أأت لكو مسألة الكعكة سيونا منها دلوات ..
نشوف الحكاية دى بعدين ..

(يلاظف شكيب ويراضيه)

الوات دا مش وأت خناء يا أخ .. !!

نبيل بك : (لدهب أفندى ، جانباً) أوكد لك إن
السبت كان مليون ..

دهب أفندى : وأنا أوكد لك إني ما أخذتش منه إلا
كعكة واحده ..

نبيل بك : وانا كان واحده

دهب أفندى : (فى صوت خفيض ، محتجاً) كعكة

واحدہ .. فی الأربعة وعشرين ساعہ :۔ ودفعت کام تمہا ..
ربع ريال .. تصدأ ؟ ؟

نبیل بك : زى ما دفعنا احنا رخرين !

بہجت الناعم : (وقد جاء إليهم ، وسمع حديثهم)
دى حسبه مضبوطة تمام ، اتو ناسيين قانون العرض والطلب ؟
دھب أفندى : (فى صوت مكتوم) دا لص محتمل
لازم أورتيہ ..

(الشيخ عميشة يطالب بالآكل)

بسبوسة : لو كان معای حاجه ما كنتش عزيتها عنك !
فہم الخشن : مش تميم يا جماعة ونستعد للصلا ؟ !
بہجت الناعم : الامام مش عاوز يصلي ، وبطنه بتؤر عليه ..
لازم يدلها حأها أبلہ !

عفاف : وليہ مانديش السميطة الى فاضله للشيخ عميشہ ؟
(مهمة من ضيوف الخبأ — عفاف تتابع حديثها ...)
السميطة دى لما تتأطع مش حينوب كل واحد منا إلا حته
صغيره ، لاهى نافعه ولا شافعه .. فأحسن حاجة إتنا نديها
للشيخ عميشہ ، ويأى لنا سواب كبير عند ربنا ..

(ضيوف الخبأ يهممون ويتشاورن)

فهم الخشن : برافو يا آنسه ..! (يهز يدها) لازم
المؤمن يوحّد نفسه ع الجوع ، بلاش الجسم ده . المهم
الروح وطهارة الألب .. إن كان علىّ ، أنا تنزلت عن حى
فى الكحكك للشيخ عميشه .. ألتو إيه بأى ؟

بهجت الناعم : ومع ذلك الواحد لما يروح الدار الآخرة
ومعدته خفيفه يبأى أحسن أوى ..! أنا كان متنازل عن
نصيبى للشيخ عميشه ..!

نبيل بك : (بعد تردد ، يذهب إلى عفاف ويهز يدها)
انت صاحبة مروءه صحيح يا آنسه .. أنا حاسبل زيك فى
الحكاية دى واتنازل عن نصيبى لوجه الله ..
القولى : وإيه يعنى حتة كحكك حنفوتها دلوات نلايم
بكره شآنىء وماآنىء فى الجنة الحلوه .. اللى ليه فى الكحكك
أنا مسامح فيه للشيخ عميشه حلال زلال ..!

(صمت من الآخرين)

فهم الخشن : (مخاطبا الذين لم يتكلموا) وانتسو
يا خواننا ..! ألتو إيه يا حضرات ... حتبعوا الآخرة
بالدنيا الفانية ؟ .. تبيعوا سعادته ما لهاش نهايه بدئيتين حنفضيهم
فى العالم الوحش ده ..

دهب أفندی : یاسیدی أنا ما عندیش مانع أفوت نصیبی ..
بس الحکایه ماتجیش کده .. خلوا فیہ ولو تعویض بسیط ..
قشقوش : تعویض إیه یا سیدنا ... ما فیش کلام
من ده ... !

دهب أفندی : طب خلاص ، زئی ما انتو عایزین ، اللي
یحیی علی کیفکم اعمالوه ...

شکیب : إه ، ما دام المسأله کده ماشیه بالأوّه ، عایزینا
نتسکلم لیہ ؟ .. ما تاخذوش رأینا امال !

یهجت الناعم : ما ترعلشی یاسی شکیب .. سیاسته الأوّه
بأت فن دبلو ماسی جدید ... !

قشقوش : الحکایه مش حبه أخذ وعطا ... علی إیه
دا کله .. أنا ما یهمنیش ، تفرء والکحکک ، تدوها للشیخ
عمیشہ ، حاجه تخصکوا ... أنا لیہ دعوه بتمنھا بس ، تدفعوه
أهلا وسهلا .. آدی الدغری !!

نبیل بک : تمنھا .. ؟ إزا کان حیاخذھا الشیخ عمیشہ ،
فطبعا مش حندفع لها تمن .. !

قشقوش : سیدی یاسیدی .. تمنھا میت إرش .. کلام
تانی ما اعرفش ... !

دهب أفندی : (یغمغم ثائرا) میت إرش ؟ ! أما صحیح
تصّاب ... ؟

قشقوش : أنا ألتها كلمة .. ميت إرش يعنى ميت إرش ..

برر فكس !

فهم الخشن : بس يا أشئوش دى

قشقوش : ما بيعهاش أأل من جنيه .. حد زنا كوا ..

انتو حرين وأنا حر .. نأص عن الجنيه ملیم مش حايعها ..

(يهن العصا الغليظة فى يده)

فهم الخشن : ما فيش مانع يا سيدى .. المسألة بسيطة

(يلتفت إلى الآخرين) إحنا طبعاً كلنا حانشارك فى تمن

الكحكه دى ، وعلى أآتمنا حيكون السواب من عند ربنا ..

(يمدطربوشه لجمع التبرعات ، ويخرج من جيبه قطعة

ذات عشرة قروش ..) آدى نصيبى دفعته يرى

القطعة فى الطربوش . عفاف تهرع نحو فهم الخشن

وتفرغ ما فى محفظها فى الطربوش . فهم الخشن يمر على

الحاضرين ، فيعطيه كل واحد شيئاً ...)

(يصيح الشيخ عميدشة أثناء ذلك مطالباً بالطعام .

تنشب مجادلة بين فهم الخشن وبين دهب افندى ، لقلة

ما أعطاه ، وتنتهى بأن يدفع مبلغاً آخر ، فهم الخشن
يحسب النقود ، فيجدها ناقصة قرشا ، يقول لقشقوش . . .
نائص إرش ويبأى الجنيه تمام . . . !

قشقوش : (يمد يده إلى صدر الشيخ عميشة بسرعة
ويخرج منه قرشا ، ويعطيه في سهولة لفهم الخشن . . .)
الجنيه دلوات تمام ! . . مش كده ؟ !

فهم الخشن : (يمد يده إليه بالمبلغ ، يناول فهم الخشن
الكعكة) وادى السميطة اهي . . مبسوط ؟ !

(فهم الخشن يأخذ الكعكة ، ينظر فيها مقلبا لإياها .
يشمها .)

الفولى : صاحبه وحياتك يا أستاذ . . !

فهم الخشن . (وهو يقبلها ويشمها في لذة ، يقول للفولى)
سادىء ؟ . . . سادىء ! (يلتفت إلى الجمع) أناجت فى بالى
فكره عايز أشاور كم فيها . . . ندى للشيخ عميشه دلوات نص
الكحكه ، ونخلي له النص التانى لبعدين . . .

شكيب : (مقاطعا) ومين اللى يشيل النص التاني معاه ؟

فهم الخشن : أنا .. مش مآ منيني ؟ ! ..

شكيب : وليه ما يكوننش انا ؟

بسبوسة : تحبوا يا أسيادى أشيله لكو أنا .. أخبسيه في

حته ما يعرفاش لجن لجر .. ؟

(النسيخ عميشه يصيح مطالباً بالكعكة ... القولى

يطيل النظر إلى الكعكة في جشع صامت ...)

فهم الخشن : أهول لكم بلاش الحكاية دي .. أنا حدى

الكعكة كلها للشيخ عميشه يعرف شغله فيها ..

شكيب : أهو اتو كده .. كل تصرفاتكو دكتاتوريه

أنا أحتج على كده .. ضرورى ناخذ الاصوات !

(في هذه الأثناء يكون بهجت الناعم جالساً في سكون

يراقب هذا المشهد في صمت وهو يتسم معتمداً بذقنه

على يديه . عفاف بجانبه)

دهب افتدى : ده صحيح .. ضرورى ناخذ الاصوات ..

(يقفز القولى بغتة ، ويحتطف الكعكة في حركة

يائسة ...)

فهم الخشن : (صائحاً) دي خيانه ! دي خيانه !

ما يصحش كده ... !

(فهم الخشن ونبيل بك وذهب افندى شكيب وبسبوسة
يهجمون على القولى . قشقوش يستغرق فى ضحك عال .
يخرج كعكة له يأكلها فى تمهل . الشيخ عميشة ينظر له
فينتهره قشقوش ، يندفع الشيخ باكياً . عفاف متألة .
محاسن تحلم كعادتها . بعد حين تنجلي المركة ، نرى كل
شخص فى يده قطعة من الكعكة آخذاً فى أكلها . الشيخ
عميشة يصيح باكياً مطالباً بالأكل ، فلا يعنى به أحد .
نرى قشقوش ينام وهو قاعد وقد اعتمد بظهره على
الحائط . شكيب يلثم قطعه ويمود الى محاسن ...)

شكيب : (لمحاسن) خرجت من الخنائة دى ما معايش
حاجه .. على رأى اللى آل : خرج م المولد بلا حرص ..
(محاسن لا تجيب . بل تقترب منه ، وتريح رأسها على
كتفه ، هو يتابع كلامه ...) على كل حال الحمد لله ما
تعوّرتش فى الهيصة دى ..

(ينظر اليها ، فيراها قد أغمضت عينها . يجلس فى
تراخ ، ويداه متدليتان .)

بسبوسة : (تحدث إلى نفسها ، وهي تنفخ في إصبعها)
أطبعه .. هم فاكرين صباعي سميطة حيا كلوها .. ؟ يا حفيظ
يارب .. ! دي ما كسنتش لؤمه اللي نابتي ..
(تخرج القطعة التي أصابتها من الكمكة ... تأكل
منها ، ثم تعود تنفخ إصبعها)

(ذهب افندى ونيل بك في ركب يا كلان
قطعتيها من الكمكة ، وقد أخرج كل منها ورقة ملح
صغيرة من جيبيه يستعين به في الأكل ...)

نيل بك : (وهو يأكل . لذهب افندى) آخر أكله
أكلتها كانت أبل الغاره المزقة دي في رستوران الريفيرا ..
ذهب افندى : (وهو يتفنن في الابقاء على قطعته)
رستوران الريفيرا (في حرة) يا سلام على طبأ السلطه
الروسي اللي بيعملوه هناك .. دا طبأ مهول خالص ! ..

نيل بك : (وهو ينظر إلى ما بقي من قطعة الكمكة
في يده ...) طبأ السلطه الروسي بس ؟ .. والشاتوريان ؟ ..
والكستليت بانيسه ألافينواز ؟ .. دي كل أصنافهم بديعه خالص . !

ذهب افندى : (وهو ينظر فى تحسر الى القطعة الصغيرة

الباقية من الكعكة ...) والاسباب حتى الانا بوليتين ؟

القولى : (فى ركن بعيد ، يغمم متحسراً ، وهو يأكل

قطعته) يا سلام يادنيا .. فىن دلوات طبأ القول المعتبر وجنبه
طبأ المخلل اللى يفتح النفس ؟ ..

(شكيب ينظر الى محاسن وقد أطالت صمتها ...)

شكيب : (يناديها) محاسن ! محاسن !

محاسن : (فى صوت خفيض) مالك ؟ عاوز إيه ؟

شكيب : إنتِ نمتِ ؟

محاسن : لأُ ما نمتش .. !

شكيب : أ مال مالك كده ساكته ومغمضه عينيكي ؟

محاسن : (فى صوتها الخفيض تفتح عينيها قائلة :)

دايحه .. دايحه أوى .. !

شكيب : ده لازم يكون من تأثير الجوع ، لو كان ناني

حاجه من الكعكة الملعونه دى ! كنت ادتها لك ! ..

(محاسن لا تجيبه . تسبل جفניה ...)

عفاف : (بهجت الناعم) دى آخر كحكه موجوده هنا..

بهجت الناعم : (يسر فى أذنها) ما تخافيش .. (يخرج

من يده قطعة، ويتناولها لإياها فى الخفاء ...) خدى ..

عفاف : (وقد أخذتها وأخفتها فى منديلها) إنت

جبتها منين ؟

بهجت الناعم : كلي والسلام .. ما لكيش دعوه ..

عفاف : وانت ؟ ..

بهجت الناعم : أنا ما تشغليش نفسك بيه !

عفاف : لازم انت راخر جعان .. !

بهجت الناعم : جعان ؟ .. وإيه يعنى ؟ .. دانا كل ما

يؤرصني الجوع أبص لك بصره أشبع من جمالك ، وأسكر

من فتنتك ! ..

عفاف : (وهى تميد إليه قطعة الكمك) لا .. لا ..

خد .. إن شا الله تعدمنى إن ما كلتهاش ..

بهجت الناعم : (وقد أرجع يدها فى تلافى) أنا حلفت

أبلك إني مش حدوء منها حاجه .. هى لك .. هاتى بوسه

من إيدك .. (تسحب يدها ولا تجيب)

(الشيخ عميشة يطالب بالطعام . عفاف تنتبه . تحتفظ
بالقطعة في منديلها ثم تنادى : إياها !)

شكيب : (محاسن) محاسن ! .. محاسن ! .. (لا تجيب .
يهزها برفق ، لا تتحرك ، يعود الى النداء) محاسن ! ..
محاسن ! .. (لا تجيب)

محاسن ! .. محاسن ! .. (لا تجيب . يحدق في وجهها
بخوف ، ثم يصيح :) إلخثوني .. حتموت مني إلخثوني ..
(الكل ينتبه اليه)

شكيب : ما فيش نفّس خالص .. إلخثوني
(يهرع إليه بهجت الناعم وعفاف . شكيب يترك
محاسن بين يدي بهجت الناعم . يحدق في محاسن وهو
يتراجع قليلا قليلا ، بسبوسة والقولى يتشبثان بجلباب
الشيخ عميشة وقد أخذ يفظ في النوم ، ويتطلعان إلى
محاسن من بعيد بحذر . . .)

بسبوسة : (مهمة) ماتت البَنِيَّة .. اللهم احفظنا .

القولى : (مهمهما) الشر بعيد .. الشر بعيد ..

(نبيل بك يهم بالذهاب لرؤية ما حدث ...)

ذهب أفندى : (ممسكا بطرف سترة نبيل بك) إنت

راجع فىن ؟

(نبيل بك يلتفت إليه . ذهب أفندى يقول :)

سامعهم يثولوا إن المدموازيل دى ماتت ... !

نبيل بك : سيبنى .. سيبنى .. !

(نبيل بك يخلص نفسه من ذهب أفندى ويذهب

مع فهم الخشن بخطوات حذرة ناحية محاسن يرقبان

ما يحدث جانبا ولا يتقدمان لعمل شيء .. يتفاوضان

باهتمام وخوف ..)

بهجت : (لعفاف) إيدنى شوية كلونيا ولا ريجه

ولا أى حاجه ..

عفاف : ما فضلش معاى ، لا ريجه ولا كلونيا ..

(تذكر شيئا)

آه .. الكونياك ! ..

بهجت الناعم : فيه هنا كونيالك ؟

عفاف : استنى ...

(تهرع إلى الناحية التي تركت فيها الزجاجتين الملفوفتين

عند دخولها الخبأ في الفصل الأول . تأتي بواحدة منهما

وتتزع سدادتها ، وتناولها لبهجت الناعم ..)

بهجت الناعم : عال ! عال ! .. جالك منين ده ... ؟

(بهجت الناعم يفرغ جرعة كونيالك في فم محاسن)

عفاف : دى هديه جتنى أبل ماجى الخبأ على طول ..

(ذهب أفندى يقصد إلى الشيخ عميدة بخطوات

مضطربة ، ويجلس بجواره مع بسبوسة والفولى . قشقوش

يفط في النوم ..)

ذهب أفندى : (للفولى) باين عليها ماتت صحيح ..

مش شايفها بتتحرك .. !

الفولى : الشر بعيد .. الشر بعيد ..

ذهب أفندى : يا ترى حيد فنوها فين ؟

بسبوسة : يدوروا لهم على حته .. بس ما تكونش

هنا ... !!

(تظهر على محاسن أمارات الحياة . . . تبدأ تفتح
أجفانها . . .)

بهجت الناعم : (لشكيب) ده كان إغماء بسيط . .
شكيب : يعني لسه عايشه ، ما جرح الهاش حاجه ؟ . .
بهجت الناعم : زى وزيرك تمام : . . !!
(فى هذه اللحظة يتقدم فهم الخشن ويمس يد محاسن ،
ثم يقول :)

فهم الخشن : القلب مستظم . . والنفض كويس . .
(عفاف تقصد إلى مكانها ، تجلس مطأطئة الرأس ،
وقد أسندت وجهها بيديها . .)
محاسن : أنا فين . . ؟ أنا فين ؟
شكيب : إنتِ معاى . . ما تخافيش من حاجه . . !
(يأخذ شكيب مكانه بجوارها محل بهجت الناعم . .)
دهب أفندى : (وقد اشرب بعقه ، وأرهف أذنيه)
دى ما ميتتش ! . . !

القولى : (يجيب وهو بجوار الشمينخ عميشة) ربنا

إبل دعوة الشيخ عيشه .. دا راجل سرّه باع .. من بُؤد
للسا العاليه ..

(دهب أفندي وبسبوسة والقولى يتبركون بالشيخ
عميشة :.. فهم الخشن ونبيل بك يتنفسان الصعداء ،
يسيران ناحية الشيخ عميشة ، مجلسان بالقرب منه صامتين
ينظران إليه بين فترة وأخرى . يقتربان منه ، يعطيانه
نقودا ...)

بهجت الناعم : (المحاسن ، وهو يقرّب من فيها الزجاجة)
خدى لك شفته تانيه ..
شكيب : أبوه ، خدى لك كان شفته ..
(يساعدها فى الشرب ...)

محاسن : (حاملة) نكونش اتنا لنا الجنة ؟ !
شكيب : الجنة ؟ ... اه ... لأ ... (يظهر عليه الضعف
من الجهد والافتعال ، يقول لبهجت الناعم وهو على وشك
السقوط :)
إلخافى يشويه من اللى معاك ده ... !

(فشقوش يستيقظ من غفوته)

(بهجت الناعم يسند شكيب ، ثم يناول جرعة ...
شكيب ينتعش ... ويقول لبهجت الناعم :)

مرسى ! ... صحيح ان الشراب ده منعش أوى ! ..

(يأخذ الزجاجة من بهجت الناعم ويشرب منها
جرعة أخرى ...)

بهجت الناعم : (يأخذ منه الزجاجة) أعصابنا اتهدمت .

(يشرب جرعة من الزجاجة) غاوزه تتجدد ... !

(نبيل بك وفهم الخشن وذهب أفندى والقولى

يراقبون من بعيد ما يحدث ويستمعون ..

شكيب : (يأخذ الزجاجة من بهجت الناعم ، يشرب

منها ، يتقدم من محاسن ويساعدها فى تجرع شئ من

الشراب ويقول :)

خدى لك شغظه تانيه يا محاسن ... ده مؤوى للألب . !

محاسن : (تشرب بلا ممانعة ، ثم تقول حالة :)

إحنا فى الجنة . : فى الجنة صحيح . . !
شكيب : (يشرب جرعة ، تبدأ الحمر تلعب برأسه)
إحنا ف طريئها . . ! يا دوبك على الأبواب ! . . حانخش
اهه . . !

دهب أفندى : (مخاطبا الذين يشربون) إنتو بتشربوا
وحدكم ولا اتش سألين على حد . . !
نبيل : الحئيته دى حاجه مخالفه لمبادئ الديمقراطية . .

عفاف : دول (تشير إلى محاسن وشكيب) ييشربوا
علشان انهم فى حاله وحشه تعبانين أوى . . !!
قشقوش : يعنى إحنا اللى بسم الله ماشاء الله ؟ ما احتارخرين
حالتنا أطران . .

محاسن : والنبي تدوله شويه . . ده يستحأ . .
فهم الخشن : ياناس خدوا بالكم من المساواه . . لازم
ما قرأش بين واحد والتاني . .

بهجت الناعم : كلمة المساواه دى عاجباني من بُؤ الاستاذ
الخشن . . على كل حال ما فيش مانع ان كل واحد ياخذله شفطه
من المشروب المؤوى للآلب ده . . بس حاسبوا على تهسكو
إنتو بطونكو خاليه . . والشفطه بما عم عشر كاسات كبار .

(بهجت الناعم يمنح نبيل بك جرعة)

نيل بك : (لبهجت الناعم) مرسى خالص .. نوعه
مش بطل ! ..

(ذهب افندى يشرب جرعة ، ويريد أن يشرب
ثانية . بهجت الناعم يحاول أخذ الزجاجة منه)

ذهب أفندى : (لبهجت الناعم) سيب الازازه يا أخى . !
أنا لسه شربت حاجه ؟ ! .

فهم الخشن : (لذهب افندى) ما شربتش حاجه ؟ ..
إنت حتغالط يا ذهب افندى ؟ ! .

(بهجت الناعم يحاول أخذ الزجاجة من ذهب افندى)

ذهب أفندى : (وهو متمسك بالزجاجة ، يخطو نحو

عفاف ..)

سبنى ، أنارايج أدى عفاف هانم شفته ..

عفاف : مرسى .. أنا ماش عاوزه اشرب ! ..

ذهب افندى : يعني انت متنازله عن نصيبك لييه ؟

(يشرب جرعة . بهجت الناعم يمسك بالزجاجة ..)

تقوم مشادة بينه وبين ذهب أفندى .)

محاسن : (لشكيب) حانعيش سوا فى الجنه

شكيب . أيوه .. دايماسوا يا حبيبتى .. ! ،
محاسن : (فزعة ، وقد تذكرت أمراً) وبابا ؟ .. مش
حيكون ويانا ؟ !

شكيب : (بتأكيد تام) لا ، لا .. مش ممكن .. ممنوع
دخول الأبهاء في الجنة .. !

(شكيب ومحاسن يتانقاز)

(بهجت الناعم يفلح في . خذ الزجاجة من دهب
افندى . يتجه إلى عفاف)

بهجت الناعم : (لعفاف) باين عليكى تعبانه يا عفاف
خدي لك شفته ..

عفاف : لا ! مش حاخذ !
(فهمم الخشن يتقدم مسرعاً إلى مكان عفاف وبهجت
الناعم)

فهمم الخشن : (لعفاف) إنت ليه مش عاوزه تشرى ؟
عفاف : حرام ..

فهمم الخشن : أما عجيبه ! (يتلفت حوله ويقول)
مين ده اللي بيثول إنه حرام ؟ حرام ليه ؟ ..

قشقوش : ماحدث يستجرى يثول !

نبيل بك : ده شراب مؤوى للآلب ومجدد للدم ! فيه إيه ؟

عفاف : أنا مش عايزه ارتكب شىء محرم وأنا على عتبة

الموت !

فهم الخشن : يا آنسى . . الضرورات تبيح المحظورات .

والدين سر لا عسر . (يتناول الزجاجاة) إنت مش مسدآتني

(يشرب جرعة ثم يعيد الزجاجاة إلى بهجت الناعم)

شكيب : يهرع الى بهجت الناعم ، ويأخذ منه الزجاجاة

ويكرع منها ، ثم يعيدها إليه (ده يثوى الألب جدا . ١

(يعود إلى محاسن — يتعانقان)

قشقوش : ماشاء الله . . ماشاء الله . . ونابى انا فين ..؟

(يهجم على بهجت الناعم ويأخذ الزجاجاة منه ،

ويكرع منها طويلا ، فيخطف بهجت الناعم الزجاجاة

منه)

بهجت الناعم : أوه . . انتو خلصتو الازازة ولسه عفاف

ما خدتش منها حاجه . . خلاص اللى فاضل بتاعها ، ماحدث

يُرب عليه . . !

(يضع الزجاجة بجانب عفاف . ينظر إلى الناحية التي
وضعت فيها عفاف الزجاجة الأخرى . . . يغمغم . . .)
أنا شايف خيال إزازة تانيه هناك . . . (يهرع إلى
الزجاجة يتفحصها) الازازة مأفوله أوى . . . ! (التفت
حوله) ما حدش فيكو معاه بريعه !?

ذهب أفندى : (متقدما) عندى مطوه فيها بريعه . . .
(يخرج المبراة ويناولها بهجت الناعم . بهجت ينزع
السداده ، يجرع من الزجاجة . ذهب أفندى يجذب
طرف سترته .) طيب فين نايبى ؟

بهجت الناعم : إنت مش خدت ؟ لسه ما استكفتش ؟
بسبوسة : (وقد أنت متحاملة على القولي) مش تدوني
أنا زخره يا أسيادى بؤ من اللي بتقولى عليه يثوى الألب ده ؟!
ذهب أفندى : (معترضا) أو . . . !

(القولى يلقى نظرة على قشقوش فيجده لا يتحرك من
مكانه ، ينزع الزجاجة من يد بهجت الناعم .)

القولى : (ليهجت الناعم) دى و ليه ضعفانه عاوز
حاجة تسندها يا بهجت يه .. خلوا عندكو حنيه !

(القولى يجرع جرعة كبيرة ، ثم يساعد بسبوسة
لتشرب . يقول لبسوسة :)

يثوى الألب يا بسوسة ويطول العمر ... اشربي ! ...
إشبرى ... !

فهم الحشن . (متقدما) ما تدوني شفته ياناس أنا حاسأط
من طولى ... !

قشقوش : (وقد خطف الزجاجة) حندى لك !
چندى لك !

(يشرب من الزجاجة طويلا ، والجمع ينظرون إليه
متعجبين ، ثم يبدءون يرجونه فى منحهم أنصبتهم فى
الجرعات ، فيقولون له بين فترة وأخرى :) والنبي شفته
يا سي أشئوش (يوزع عليهم الجرعات وهو ممسك بالزجاجة ،
لا يدعها لأحد ...)

فهم الحشن (وقد لعبت الحمر برأسه ، يعتلى دكة من

الد كالك ، ويقف موقف الخطيب . يصيح :
 سيداتي ، سادتي : لقد امتحنتنا الخطوب ، فوجدت منا
 رجالا شجعانا يصمدون للشدائد ، إننا مفتخرة العصور ..!
 ذهب أفندي : ما فيش سك ! .. مفتخرة العصور ..!
 عفاف : (تتلفت حولها) آه ياربي ! .. إيه دا كله ..!
 ذهب أفندي : (لعفاف) إحنا مفتخرة العصور يا آنسه !
 فهم الخشن : (صائحا) نعم — نحن مفتخرة العصور ،
 وليحي السرور ! .. !

الجميع : ليحي السرور ! .. !
 بهجت الناعم : (وقد انقلب سكره غما ، يدمدم :)
 السرور ولا الجور ؟ !

نبيل بك : زى بعضه ... (يتقدم من عفاف وينعني
 أمامها) آنسى ... أدعوك للرقص ... ! !

عفاف : (معتذرة) أرجوك تسيبنى دلوات ... !
 محاسن : (وقد قهرت إليه) تسمح يا يه ... تانجو
 ولا رومبا ... ؟ !

نبيل بك : (صأحا) رومبا .. رومبا .. (يتماسكان)

شكيب : (يهرع الى عفاف)تسمحى يا آنسه .. تانجو

ولارومبا؟ (عفاف لا تجيب . تحديق فى السماء)

(نبيل بك ومحاسن يترك كل منهما الاخر لحظة وفق

أصول رقصه الرومبا)

(محاسن تتلوي بمفردها راقصة أمام نبيل بك . يصفق

لها . ثم يشتبكان ثانيا . .)

شكيب : (وقد تحمس) الله ! الله (يرقص بمفرده)

(عندما يفرق نبيل بك ومحاسن بعد الدورة الثانية ،

نجد فهم الخشن قد تقدم واجتذب محاسن فلا تمنع ،

وترسل ضحكة ناعمة مدوية ، ثم تقع مجبودة ، فيتلفها

شكيب بين ذراعيه ويقبلها بلهفة . . .)

القولى : (صأحا) شوبش يا حبايب . . . الرأس ،

الرأس . . . أنا حفرجكواغ الرأس البلدى العال ، على

أصول الصنعه . . !

(الفولي يحزم خاصرته ، ويتناول العصا من قشقوش ...)

اعمل معروف يا معلم أشوش غني لنا موال بلدى على زوءك ،
وحياة الجدمان اللى ويا نا ... تدوم التفاريح !

(الجميع يصفقون للفولى ، وهو يرقص . تتقدم بسبوسة ، وقد كشفت عن رأسها وتحزمت بملاءتها ،
تدخل حلبة الرقص مع الفولى وترقص ...)
قشقوش : (يعنى)

يا لفتك فى الملايه ضيعت هلى !
إمته تدوب الملايه وارجع ل هلى ؟

(قشقوش يتابع غناؤه ، والآخرون يصيحون
بآه ... ! اجمع يصفق على النغم ، الفولى وبسبوسة يرقصان .
عفاف فى مكانها لا تتحرك عاقدة يدها على صدرها وناظرة
إلى فوق . بهجت الناعم ساهم يدخن لفاقة تبغ وهو ينقل
عينيه بين عفاف وسقف المخبأ ..)

تنزل الستارة

الفصل الثالث

(المنظر السابق نفسه ...)

(شمة تضيء المكان .. جميع

الموجودين في حالة إعياء شديد ، غير

أن قشقوش وبهجت الناعم أحسن

حالا . الآخرون يتنفسون في

صعوبة ، صدورهم مفتوحة : يروحون

بأيديهم ومناديلهم . الشيخ عميشة

جالس في الصدر ، معتمد بظهره

على الحائط ينهج في حشرجة . الجمع

حوله يتعلمون إليه في ابتهاج . غير

أن محاسن أبعدهم عنه ، مغمضة

العينين ..)

غفاف : (وهي مطبقة الأجفان ، تقول لهجت الناعم :)
الساعة كام دلوات ؟ !

بهجت الناعم : (وقد ألقى نظرة على ساعته) نص
الليل ... !

شكيب : (صائحاً ، بقدر ما تسعفه قوته) نص
الليل ... ؟ يستحيل ... !

نبيل بك : (ينظر في ساعته) نص الليل تمام ... يعني.
بأى لنا في الخبأ ده تمانيه واربعين ساعه ... !

شكيب : مستحيل ... مستحيل ...
بهجت الناعم : آمال بأى لنا أدّ إيه يعني ؟

شكيب : أول تمانيه واربعين يوم ، ولا أول تمانيه
واربعين سنه (يفتح صدر قميصه بشدة ، ويروح على صدره)

أنا حاسس إن الهوا يتأص شويه بشويه ... (ينهج) أف ..
أف ..

فهم الخشن : (بصوت ضعيف ، وقد أشار الى الشمعة)
مش تطفوا الشمعه دى ؟ .. دى بتشاركنا فى استهلاك
الأكسجين ياخوانا ..

القول: (مذعوراً) إزاي تطفوا الشمعه .. حاتخلونا
في العتمه ..؟!
بهجت الناعم: ويعنى هي فايدانا إيه؟ اطفوها.. اطفوها..
دهب افندى: لا، لا.. (باستمطاف) آهي برضه
ما نسانا، ماتخلونا ش نموت في العتمه المؤبضه ..!

محاسن: (بمفردها تناجي نفسها في غيبوبة) يلا
يا حبيبي نمشي سوا في السكه الخضرا الواسعة دي .. يلا
نستحمي ونشرب من الميه الصافيه .. أرب الكاس على ..
تعالى لى يا حبيبي على مهلك ..!

شكيب: (بعيداً عنها) أنا حاتخني .. حاتخني ..!
فهم الحشن: يا اخواننا ارحمونا واطفوا الشمعه دي ..
عفاف: (في ابتهاج) يا لله بأه يا ربى خلصنا من اللى
احنا فيه .. كفايه عزاب ..!

نييل بك: (وقد أقبل على عميشة يستمطفه)
إنت فيك البركه، ومنك الخير .. أليك الطاهر. ونيك الصافيه
تخلي دعوتك مستجابه عند الله ... ادعى لنا واطلب
لنا الرحمه ...!

(الجميع يقبلون على الشيخ عميشة ، يستصرخونه
ليطلب لهم الشفاعة عند الله ، يناشدونه في استعطاف حار
أن يجيب طلبهم . الشيخ عميشة يصرخ طالبا طعاما
ولا يعيرهم التفاتا ..)

(قشقوش وبهجت الناعم أقل حماسة من الآخرين ..
عفاف لم تترك مكانها ، وهي دائما في غيوبتها تحلم . الأصوات
تضعف ويبدأ . ضيوف المخبأ يتهاككون لإعياء وضعفا على
الأرض ، وهم يطلبون الهواء . الشمعة تنطفئ .. لا تسمع
إلا ألقاس متقطعة ، نعم الظلمة المخبأ بعض الوقت ..
بعد حين تسمع أصوات معاول من بعيد .. يتوضح
الصوت .. ينال التراب من سقف المخبأ .. صوت
الحفر مبسوع .. تصدر من الشيخ عميشة أصوات
غريبة وكأنه فطن إلى حدوث أمر جديد ..)

بسبوسة : (للشيخ عميشة) مالك يا شيخ عميشة ؟

إستريح .. ما تئلدش نفسك .. ما فيش حاجة ..

عفاف : (تستقيم شيئاً) بهجت .. بهجت .. منتش
سامع ؟ (خائفة)

بهجت الناعم : (وهو في غفوته) ألت لكم ما تثلثونيش ..

نبيل بك : (وهو في سباته) أيوه ما تثلثونيش ...

كفايه زِعيءٌ وِسخوته بأى ... !!

عفاف : إيه ده ؟ إيه الكر كبه دى ، هو فى المنجأ عقاريت ؟!

دهب أفندى : (وقد أرهف سممه) أنا سامع دء !!

(صائحاً) يا نبيل يه .. إنتَ فين ؟

(تسمع أصوات آدميين من الخارج مع أصوات

المعاول .. التراب ينهال بشدة على وجه نبيل بك ..

يرفع رأسه مذعوراً . يدعك عينيه . تلتفت حوله ..

تصيبه بعض الحجارة المتساقطة .. يهب واقفا وهو يترنح :

إيه ده ؟ إيه ده ؟ المنجأ بينهد علينا ... (يصيح) ما فيش حد

ينجِدنا (يجرى هاربا ليحتمى في ركن آمن ...)

(الكل يستيقظون ، يجرون أنفسهم في هرج ومرج ،

يتطلعون يمنة ويسرة . يقولون :إيه اللي حصل ... ؟ إيه
اللى جري ... ؟

(ينهال التراب والحجارة بشدة ، وتنفتح ثغرة . نور
المصاييح من الخارج يبدد ظلام الخبا ...)

القولى : (وقد نظر إلى فوق ، يصيح فى شدة)
أدى احنا خلاص نجينا ... خلاص نجينا ... (يسقط
مغشيا عليه)

(نبيل بك وذهب افندى وبسبوسة وشكيب
يصيحون صياح الفرح ... قشقوش يمدق فى الثغرة
ذاهلا وهو صامت ... محاسن تفتح عينيها تحلق فى الثغرة
مبهوتة مفتوحة انهم لا تنبس . عفاف تلتفت حولها فى
فى ذهول ...)

القولى : (فيق من غشيته ، يرفع رأسه ، فيقابله
النور ، يصيح :) خلاص نجينا .. ١ ..
(ولكنه لا يكاد يتم الجملة ، حتى يقع مغشيا عليه ثانيا)

(نبيل بك وذهب افندى ، وفهم الخشن ، وبهجت
 الناعم ، وبسبوسة ، يتطلعون إلى الثمرة ويصيحون :)
 إحتنا نجينا .. (يحتضن بعضهم بعضا ، وتشد جلبتهم
 ولكن سرعان ما يضعف صوتهم وحر كآتهم من الاعياء .
 أحد رجال الاسعاف يهبط بحبل ، ومعه مشعل . يحمل
 الأطعمة وبعض المسغفات اللازمة . يتجمع حوله الناس)
 رجل الاسعاف : (يوزع عليهم اللبن والخبز) خد ..
 وانت خد .. وانت راخر خد . (وهو يتفحصهم)
 مافيش حد فيكم متعور ؟ (لأحد يجيبه) يعني مافيش حد
 بيرد !؟ (كلهم منهمكون في الاكل ، يقولون :) مافيش
 حد ، مافيش حد !
 (بعض منهم يقول وفه مملوء :) مافيش حد ! ...
 مافيش حد ... !
 (يرى قشقوش قد اتحنى ناحية بعيدة ، وجلس
 يأكل صامتا . الثمرة يظهر منها بعض رؤوس ينظرون إلى

ما وقع في الخبأ . رجل الاسعاف يلحظ أن القولى لا يتحرك
فيسرع اليه يتفحصه . يعطيه منعشا . يبدأ يفيق ، يمسح عينيه
القولى : (صائحا) إحتنا خلاص نجينا . (يعانق رجل
الاسعاف بحرارة ، وهو يمسح عينيه ، يناوله رجل الاسعاف
صحنه ، يأخذه القولى بالهفة ، ويندفع يأكل وهو يغعم)
ما خلاص نجينا . . . ١١

(محاسن تفقو بعد الأكل تواء ..)

شكيب : (لمحاسن) الله ! .. إنت حتنامى يا محاسن ؟
هو ده وأت نوم ؟ ! (يهزها) محاسن ! ؟ ..
(يمتريه الحمول ويتثأب ، يدهمه الناس)

(عفاف مازالت تلتفت حولها في ذهول ، وترفع
رأسها ، وتحقق في الشجرة ، تستيقظ تدريجا من ذهولها)
عفاف : (تلتفت الى بهجت الناعم وتصرخ : إحتنا
نجينا مش كده ؟ !

بهجت الناعم : نجينا . . نجينا والحمد لله . (ييسط لها ذراعيه ،
قترتمى على صدره ، وهى تضحك وتبكي ، يحتضن كل منهما

صاحبه . بهجت الناعم يأتى لعفاف بصحنها يقول : مش
تا كلى

عفاف : (تأخذ صحنقتها، وتنظر فيها) طيب ! طيب ، ما كل
(تندفع ضاحكة . .)

(رجل الاسعاف بينهم ، يعنى بأمرهم ، ويوزع عليهم
الطعام . القولى يقتل شاربته . عفاف تبدأ العناية بهندامها
أثناء الاكل . .)

ذهب أفندي : (وهو منحن على صحنه ، يلتهم طعامه
وقد دنا من نبيل بك . .) مين كان يظن اننا حنخرج من
الأبرده ، ولسه فينا روح ؟ !

نبيل بك : (وقد جلس فى عظمة يأكل ، ووضع رجلا
على رجل . . يهقه) مين كان يظن . . إبعد شويه بالصحن
بتاعك . ! ؟

فهم الخشن : (لنبيل بك) أوكد لك يا إكسلانس إني
ما فادتش الامل فى التجاه لحظه واحده . .
نبيل بك : وده كان شعورى بالضبط . . !

(شكيب ومحاسن يستيقظان من غفوتهما . يتمطيان)

ينظر أحدهما إلى الآخر ..)

شكيب : (لمحسن) حمد الله على السلامة بالمحسن .. إشال
الكابوس عنا ، ورجعنا للدنيا تاني .. !

محسن : (تنظر اليه ، تبسم ابتسامة يشوبها الحزن)
صحيح رجعنا الدنيا .. (تضع الصحن جانباً لتمسح فيها
(شكيب يمسك يديها ونهزهما ، تخلص يديها منه في صمت
ثم تناول صحنها ثانياً وتأكل في ببطء . شكيب بجانبها
يكلمها في حماس وهي تجيبه في سكون ، وعيناها لا تفارقان
الصحن . يقوم شكيب ليكلم الآخرين ، ثم يعود إليها
وهكذا ..)

بهجت الناعم : (لعفاف) عجبتك الرحلة دي ؟

عفاف : (وقد أنهكت ترين نفسها) رحلة إيه ؟

بهجت الناعم : رحلتنا إلى العالم الثاني ... !

عفاف : (تحدق فيه لحظة ، صامته ، تفهم : العالم الثاني ؟

تطلق ضحكة فجائية) آه ... دي كانت رحلة لطيفة
أوى ... !!

نبيل بك : (وهو يمسح شاربه مسحة أرستقراطية)

أؤكد لك يا ذهب أفندي إني ما فأدئش الأمل ولا لحظه واحده
كنت بتفرج على اللي بيحصل حواليه زى اللي بيتفرج على
رواية لطيفة !

ذهب أفندي : روايه لطيفه ؟ أبوه دى كانت لطيفه خالص
مقبش كده ... !

فهم الحشن : (لنيل بك) أعصاب ذهب أفندي ما تندرش
تستحمل المغامرات اللي زى دى ...

ذهب أفندي : المهم إننا نجينا والسلام ...

بسبوسة : (وقد سمعت قول ذهب أفندي) نجينا ببركة
عم الشيخ عميشه ... ربنا يخليه لنا هو اللي حفظنا وصا ...

فهم الحشن : (وقد التفت اليها بترفع . يندفع مقهها
وهو يقول :) بركة الشيخ عميشه ؟ !! (ينظر إلى نيل بك)

نيل بك : (يقهقه سخرية) بركة الشيخ عميشه !

(الشيخ عميشة وقد ألهم نصيبه ، يقصد إلى القولى

يتطلع فيما بقى من طعامه)

القولى : (يرفع بصره ، ويحدج الشيخ ، وهو يقول

في حدة :) مكلفي انا راخر . . ! مش كده ! ؟

(الشيخ عميشة يرتاع ويعود إلى مكانه ... القولى
يفتل شاربه)

بسبوسة : (لرجل الاسعاف ، وقد اقترب منها
ليفتحصها ...) ياترى يابنى ما شفتش الواد فتوه ؟! الواد فتـ..
(ترى القولى يتطلع إليها ويحدجها بنظرة جافة) الواد ابن
بنى تاه منى ع الرصيف ، ما لئيهوش ؟!

رجل الاسعاف : (بلهجة سخرية) ابن بنتك ؟ هو بس ؟!
ما تسألنيش كان عن أبوك وامك ؟!

محاسن : (وهى تتطلع الى الثغرة ، وبجانها شكيب)
يكونش بابا وماما فى الناس دول ؟ ! :

شكيب : بابا وماما ؟! (يرنو الى الثغرة) ما أظنش ..
ما أظنش .. (محاسن تشفق بالبكاء دفعة واحدة ، وتخفى
وجهها فى منديلها . شكيب يقول :) إيه اللي حصل ؟!
(يريد أن يحوطها بذراعه)

محاسن : سيني .. ألت لك سيني .. !

ذهب افندى : (وقد رفع رأسه أخيراً عن صحنه .
يلتفت حوله باحشاً عن شخص . أخيراً يقع بصره على
قشقوش ..) آه .. انت هناك ؟! (ينظر الى رجل الاسعاف)
فلوسى يا حضرة فلوسى .. أنا انتهيت ، رجّعوا لى فلوسى ،
(رجل الاسعاف يتساءل . ذهب افندى يشير الى قشقوش)
هو اللى نهينا .. هو اللى سرأنا ..

رجل الاسعاف : أنا دلوات جاى عشان اسعفكم ..
والحكايات دى بعدين .. !

ذهب أفندى : (يتشبث برجل الاسعاف) ده باع
لنا السيمطه بميت إرش ! تسدأ .. ؟ !

رجل الاسعاف : بتقول إيه ؟
ذهب أفندى : أجلف لك بدني وأيمانى أنه باعها لنا بميت
إرش ما ينأصوش ملیم واحد .. !

رجل الاسعاف : (يضحك ملء شديه) السميطة
بجنيه ؟ جنيه ؟ !

(همهمة وضحك من الناس الملتفين حول الثغرة ، رجل

الاسعاف يقول لقشقوش (

صحيح بت لهم السميطة بيت إرش ؟

·(قشقوش يرفع بصره في رجل الاسعاف ولا يتكلم .

رجل الاسعاف يوجه كلامه الى الجميع) وازاي
'فتوه ينهيك بالشكل الفظيع ده .. ؟

دهب أفندي : لازم يرجع لكل واحد حوة .. هو ما فيش
حكومه ؟ !

شكيب : أنا مع دهب أفندي في الطلب ده !

دهب أفندي : (متحمسا ، ومخاطباً الآخرين :)

واتتو ؟ رأيكم إيه ؟ ما تتكلموا .. ؟ !

فهم الخشن : (متعاطفا) الواد ده جرت منه حاجات

ما هياش لايته ، ولازم يتأدب عليها . ولكن معلش ، الحكايه
بسيطة ، بعدين نبأى نشوف لما نطلع من هنا .. .

دهب أفندي : أنا بثول ع الفلوس اللي نهيا متنا .. .

حتسكتوا عليها ؟ !

نبيل بك : (راغبا في إخفاء الأمر أمام رجل الاسعاف)

دى شوية أروش ادناها له عشان أدّم لنا بعض خدمات ...

ذهب أفندى : (وهو يصيح ، وقد هجم على قشقوش :)
مستحيل أخرج من هنا أبل الولد ده ما يرجع لى الفلوس
القولى : (وقد تداخل بينهما ، لذهب أفندى)
تندر تطلب فلوسك بعد ما نخرج من هنا ، إذا كان لك عنده
فلوس صحيح . . !
ذهب أفندى : إذا كان لى عنده فلوس ؟ هو مش خد
منك انت راخر . . ؟ !

القولى ذهب أفندى : (بغلظة) أنا مسافر فى فشر ! ياخذ منى
فلوس ؟ ! . . تندر ؟ دانا كنت سيحت دمه ، وعلاته زى
الديحه . . دده ! . . ياخى دده ! . .

(ذهب أفندى يتراجع)

رجل الاسعاف : تندروا تشوفوا المسألة دى فى التمن . .
القولى : أبوه نروح التمن . . الحكومة لا هي أبو ده ،
ولا هي أبو ده . . التمن يعرف خلاصه ، ويشوف إجراءاته
(يميل جانباً ويقول لقشقوش هامسا فى أمر :) هات
يا واد . . هات . . !

(ينتحى بقشقوش فى ركن ويمد يده فى جيبه ،
ويأخذ كل مامعه ، ثم يدفعه فى جيبه ، يتلقى قشقوش
الدفعة بالصمت)

رجل الاسعاف : (يوجه كلامه للجميع ، وقد هياً
الحبل على شكل مقعد . . .) دلوات يلا استعدوا
للطلوع . . واحد . . واحد . . !

(يتجمعون عليه ويقولون :)

يلا ! يلا . . . !

رجل الاسعاف : ألت واحد واحد . . الستات أبله . .
الجنس اللطيف يتقدم . . !

(يهبط في هذه اللحظة من الشجرة علي الحبل « البهي
أفندي » جيبه مملوء برزم الأوراق والصحف ، يحمل
معه آلة تصوير . يتقدم من الجميع وهو يهيج :)

البهي أفندي : أنا سمعت دلوات بالحادث العجيب اللي جرى
لكم ، جيت لكم فوراً عشان أعمل معاكم حديث لجرنال
« الاستقلال » وانشر لكم صوركم . . أنا أقدم لكم نفسي
يا حضرات . سامي البهي مراسل جريدة الاستقلال ، وأنا لي
الشرف إني أكون أول جرنال يست جه المنجأ بعد فتحه ،
وأكلم مع أبطاله اللي اندفنوا أحياء ، وطلعوا بالسلامه . .

رجل الاسعاف : (للبهي أفندي) دلوات لازم يخرجوا

من الخبأ ، إذا كنت عاوز منهم حاجة تأبلمهم بره ...
البهى أفندى : برّه ؟ إزّأى ؟ دنا عاوز آخذ صورهم وهمّ
هنا .. ولا بد أسمع كلامهم وهمّ فى المكان العجيب ده ، لسه
متأثرين بالحاله اللي حصلت لهم ، حالة دفنهم بالحيا ..
رجل الاسعاف : يا أستاذ إن ..

البهى أفندى : (مقاطعا) لكن إذا خرجوا مش حيكون
للصوره أى قيمه فنيه صحفيه .. و كان كلامهم ما حياش
فيه الطرافه المطلوبه .. فمن فضلك ما تعطلش على مهمتى زى
ما أنا قاهمها بصفى جرنالست .. !
رجل الاسعاف : الجنس اللطيف يتندم .. الجنس اللطيف
أبلا ... !!

(البهى أفندى ينهمك فى إعداد آلة التصوير ...)

شكيب : (لمحاسن) يلا .. يلا .. خنخرج !
محاسن : (وقد قامت مدفوعة بشكيب ، تقول
فى خوف وجزع :) بس بابا .. وماما !
شكيب : لازم يكونوا مستئينا فى البيت ، ويمكن يكونوا
عرفوا اتنا هنا ، وجم بالعريه يابلونا ..
محاسن : (نفمغم جزعة) آه ياربى ! ..

شكيب : إيه ؟

رجل الاسعاف : الجنس اللطيف أبلا ...

(محاسن متلكثة . عفاف منهمكة في تزيين نفسها ...)

فهم الحشن : (لنيل بك) ترضي سعادتك تترسم في

الحنه دى ... ؟

نيل بك : لا ... لا ... ! ؟

فهم الحشن : وأنا راخر رأي كده !!

نيل بك : (فى احتقار) حوهم يوزعوا الراجل المصوراتى ،

ده ...

ذهب افندى : يثول إنه جرنال يست ...

نيل بك : على كل حال أنا ماعنديش وأت آبل فيه

صحفين ... !

فهم الحشن : ولا أنا كان ...

البهى افندى : (وقد أعد آلة التصوير) انصفوا كده :

لازم يظهر شكل المحبأ ...

(القولى أول شخص يقف أمام آلة التصوير ، وقد

قتل شاربته ، وأمسك عصاه الغليظة ، كأنه فارس

مغوار ...)

القولى : يلا يا سيدى ... تعال ارسم بآى ...
رجل الاسعاف : (يصيح) الجنس اللطيف هو الذى
يتقدم ..

بهجت الناعم : (لعفاف) الراجل حسه انديج من الزعىء
ينادى ع الجنس اللطيف .. يلا ..
عفاف : أيوه ، يلا ..

(تعطيه المرأة ، فيمسكها لها . هى منهمكة فى
الزينة ..)

(البهى افندى يمر على الموجودين ليجمعهم أمام آلة
التصوير . يقع بصره على عفاف ..)

البهى افندى : (مهلا لعفاف) الآنسه عفاف ؟ الآنسه عفاف
نفسها ؟ .. عايشه ؟ دا من حظ الفن انك رجعتى له .. !

عفاف : (وهى مازالت منهمكة فى الزينة وهجت
الناعم أمامها بالمرآة) اتو افكرتوني مت ؟ !

البهى افندى : دى الاشاعه ملت الكازينو امبارخ والكل
اعتادوا انك لاسمح الله من ضحايا الغاره .. واللى أكذ
الحكاية انهم لثوا متديك بين الاتقاض .

عفاف : (وقد نظرت اليه) مندبلى تحت الاناض ؟
يمكن ! (تمنحه يدها فيقبلها بحرارة) والكازينو اشتغل
امبارح ؟

البهي أفندى : زى العاده . طبعاً تحت ضغط الجمهور !
عفاف : (متعجبة) والاستعراض ؟ مين اللي آم
بدورى فيه ؟

البهي أفندى : الانسه ببى كتكوت ..
عفاف : (مستهجنة) ببى كتكوت ؟ حاه !! ياما احسن
ما اختاروا .. يعنى مالثوش غيرها ؟ !
رجل الاسعاف : الجنس اللطيف أبلا !
بهجت الناعم : (لرجل الاسعاف) لحظه واحده
نبيل بك : (صاعجاً) نظام فاسد ..

(يخرج ساعته وينظر فيها)

دول مستنيني في النادي دلوات .. !
شكيب : (المحاسن) ليه ماتتاديش وتستعدى للخروج
بأه .. ؟

محاسن : (متلكئة ، ومتضايقه من قوله) أنا مستعده
ولكن انت ما بعملش حاجه عشاقى .. انت مش شايف الزجه

دی کله؟ . ازاي حامشی لحد الحبل ؟
 شکب : (ینظر الی الطريق فیجده خالیا) الزحمة ؟ فین
 هی دی ؟
 محاسن : یعنی حضرتک مش عاوز توسع لی الطریء ؟
 مرسى . .

(تعود أدراجها الی مکانها الاول)

شکب . (یلحق بها) هوّ ده وأت العناد یا محاسن ؟ !
 محاسن : خلاص . . ملیکش دعوه بی . مرسى ! . انا عنیده
 وأخلائی وحشه کان !
 شکب : انا ما ألتکیش کده . .
 (یقبل علیها)

محاسن : (تدفعه) سینی . . سینی من فضلك . . !!
 القولى : (وهو واقف أمام آلة التصوير ، یقتل شاربہ
 یخاطب البهی افندی :) أنا مستعد . . تعال ارسم !
 بسبوسة : (تقف بجواره ، وهی تهلل هندامها وترتب
 شعرها) أد احنا کلنا استعدادنا هو . .
 القولى : (وقد رماها بنظرة احتقار قاسية) ما تُنفیش
 جنی . . إبعدی شویه . . !

بسبوسة : (وهى تمتد قليلا) حاضر يا بنى ..

عفاف : (للبهى افندى وهى ساخرة) أظن الاستعراض
بتاع امبارح صادف نجاح باهر بالآنسة بيبي كتكوت ... !
البهى افندى : (متملقاً) يا سلام ! .. صادف الفشل اللي
مستنيه .. ولكن جرت حادته غريبه أوى ..

بهجت الناعم : حادثة إيه ؟

البهى افندى : أرب ما ينتهى الفصل الثانى اتأدم الوجيه
توحه المنيأوى ، وأدّم للآنسة بيبي كتكوت صُحبة ورد
مُجواها عُند غالى أوى .. !

عفاف : توحه المنيأوى ؟ الدّون .. ! (تغمغم) هم بيتاسموا
ف ميراسى وانا لستّه حيّه ؟ ! (صائحَة) حورّيهم ... !
(تسرع إلى جهة الجبل ، تقول لرجل الاسعاف :)
بلاّ طلغنى بأه ... !

(رجل الاسعاف يجلسها على المقعد الذبى هياه ...)
البهى افندى : (وقد أمسك بالجبل يمنعهما من الصعود)
إيه ؟ حتخرجى أبل مأخذ صورتك ... ؟

عفاف : سيني .. مافيش عندى وأت !
البهي افندى : لحظة واحده .. وحياة أبوكي .. إنت
عاوزه تخبري بيتي ؟ .. هي دي فرصه لها أخت ؟ !

رجل الاسعاف : (للبهي افندى) سيب الحبل ! ..

البهي افندى : (لعفاف) أهوكده بوظ عال خالص ! ..

رجل الاسعاف : ألت لك سيب الحبل ..

البهي افندى : (لرجل الاسعاف) يا حضرة سيني ..

أنا بأدِّي واجب !

رجل الاسعاف : واجب ؟ أنا مليس شأن بالواجب ..

بتاعك ده ! ..

(يمسك به يحاول إبعاده)

البهي افندى : (وقد احتد) بشول لك سيني أحسن بعيدين !

رجل الاسعاف : بعيدين إيه ، وأبلىن إيه ؟ ..

الفولى : (بغلظة لرجل الاسعاف) ما تسيب الراجل

لما يرسمنا ..

رجل الاسعاف : (للفولى) 'خليك ف نفسك ، مِلِكش

دعوه بغيرك ! ..

القولى : (وقد أمسك بخناق رجل الاسعاف)
لأ... لأ... أنا ليّه دعوه ونص .. وانت باين عليك دُغُف
ما عند كش زوء ولا إنسانيه ..

رجل الاسعاف : (يمسك به) دُغُف ؟ أنا دغف ؟ طيب
تُخد (يضر به)

(القولى ورجل الاسعاف يتضاربان . بسبوسة تصوت ..
هرج ومرج فى الحجاب .. اثنان من رجال الشرطة يهبطان
الحجاباً على الجبل ..)

(فى هذه اللحظة تطلق صفارات الانذار بمحدث غارة
جوية جديدة .. الكل ييهتون .. ينظرون الى الثغرة ..
يتصايحون)

الجميع : (وقد هجموا على الجبل يريدون التعلق به
للخروج) إلتئونا .. إلتئونا !

(الجبل ينقطع ، يقع الناس بعضهم على بعض ..
صفارات الانذار تدوى .. بعد لحظة تسمع طلقات

المدافع . . الثغرة يهجرها من كانوا حولها . بمض حجارة
وأتربة تنهال من الثغرة . .)

(في هذا الوقت نرى قشقوش قد توسط المخبأ ،
ووضع يديه في خاصرته ، وانطلق يمهقه ا . .)

ستار الختام



المطبوع للمؤلف : ١ — في العربية

الوثبة الأولى

الحاج شلبي

أبو علي عامل أرتيست

الأطلال

الشيخ عفا الله

قلب غانية

فرعون الصغير

نداء المجهول (من منشورات دارالمكشوف ببيروت)

مكتوب على الجبين

نشوء القصة وتطورها

ثلاث مسرحيات : الصعلوك . أبو شوشه . الموكب

(باللغة العامية)

عروس النيل : مسرحية غنائية (باللغة العامية)

الخبأ رقم ١٣ : مسرحية ذات ثلاثة فصول

(باللغة العامية)

ج — في الفرنسية : غراميات سامي

Lcs Amours de Sami

Lee ecrivains Contemporains 26 Rue des Tourneiles

Paris 1 Ve.

ح — في الألمانية : مجموعة قصص (اختارها وترجمها المستشرق

السويسري الدكتور ويدمار)

Mahmūd Taimūr

von Dr. G. Widmer

Arther Collignon, Buch handlung fur Kunst

und Wissenschaft G. m. b. H. - Berlin N W 7

تحت الطبع للمؤلف :

عوالى

مسرحية ذات ثلاثة فصول

قال الراوى

نخبة من القصص للنساء والأسرة

بنت الشيطان

وقصص أخرى

ثلاثون يوماً في بلاد ابن سعود

ثانى الهدايا

التي يقدمها عدد الحوادث الشهرى الممتاز

تأليف

الصحفى المعروف الاستاذ محمد صبرى

يشتمل على وصف صحفى طريف للرحلة التي قام بها المؤلف
في العام الماضى إلى الأقطار الحجازية ، حاجاً وصحفيّاً ،
من ابتداء الاستعداد للسفر فى القاهرة إلى أن عادت به
الباخرة لىناء السويس ، فى أسلوب رائع ، وتصوير أخاذ

مع فصل فى تاريخ الملك ابن سعود

والكتاب محلى بأ كبير وأوفى وأدق مجموعة صور للحج
والبلاد الاسلامية المقدسة

ظهر أخيراً

فاطلبه من المكتبة التي تتعامل معها

الهدايا الاربعة التى يقدمها

العدد الشهري الممتاز
من جريدة «الحوادث»

ثلاثون يوما فى بلاد ابن سعود

تأليف الاستاذ محمد حمدى

مع كتاب آخر من الكتب الثلاثة الآتية :

- (١) ثلاث مسرحيات من فصل واحد — بقلم الاستاذ محمود تيمور بك
(٢) خفايا الحرب الحاضرة — — — محمد خطاب بك
(٣) أمريكا كما عرفتها — — — على اسماعيل بك

لكل مشترك داخل القطر يسدد اشتراكه عن سنة كاملة

وقيمة الاشتراك مع الهدايا ٢٥ قرشا فقط !!

Bibliotheca Alexandrina



0420036

والعدد الشهري الذى تصدره جريدة «الحوادث»

كل مثقف - ومثقف - يرغب فى قراءة أوفى المعلومات
عن أحدث الموضوعات التى تشغل بال العلماء والباحثين فى
أولا بأول . كما أن كل عدد يحتوى على « يوميات
سجل شهرى مصور لتاريخ الحرب فى كل شهر ، يبحر
الحرب بفهم ودراية

ترسل الاشتراكات بالعنوان الآتى . جريدة الحوادث

الشهرى — قسم الاشتراكات ٤ شارع الطوابة باب الخلق ت ٥٨٣٤٧